


# BAEBELE, MOKAPO YA MOTOBA <sup>3</sup>

 Mbote, baninga. Ezali litomba kozala awa. Mpe—mpe kokókisa liyingisi monene oyo mokengeli na biso auti koloba, na ntembe te ekosenga bomoi ya solosolo, boye te? Boye, tozali kopesa lokumu epai ya Nkolo mpo na banguya na Ye nyonso ya kobikisa babeli mpe mawa na Ye oyo asili kopesa biso na mibu nyonso oyo elandani.

Sikawa nazali na mwa mayebisi ya kopesa. Ya liboso, biso, Ndeko Wood mpe Ndeko Roberson, mpe tolingi kotóndo bino nyonso ndenge bobondelaki mpo na biso, mpo na mobembo malamau. Tolekisaki ntango malamau mingi; tokendeke mikolo minei na ndambo, nabanzi, mpe tozongi na kimia. Nkolo apambolaki biso mpenza.

<sup>506</sup> Sikawa, tozali koyebisa ete Ndeko Graham Snelling, mayangani na ye ya kolamuka ezali kokóba, kuna na—na nsuka ya Avenue Brigham, na . . . awa na engumba. Mpe mokolo ya Misato oyo na mpokwa . . . nalingi kokende lobi, nsima na molulu ya matanga oyo nakoyebisa yango nsima na mwa ngonga. Tokoyebisa bino mokolo ya misato na mpokwa. Tolingi kokende kuna na lisanga ya bandeko, mpo tótala Ndeko Graham liboso ete ásilisa mayangani na ye kuna. Mpe tokomeka kosangisa losambo mobimba elongo, soko tokokoka, mpo tókende lokola lisanga moko ya bandeko kokutana elongo, kozala elongo ná Ndeko Graham na moko na mayangani na ye.

<sup>507</sup> Mpe, sikawa, nsima ya nzánga oyo na—na esika babongisaka bibembe na Charlestown, ezali mpo—mpo na Mme Colvin moko boye, oyo kala azalaki koya na losambo oyo, eleki mibu mingi, akómaki na mibu ntuku nsambo na minei, atikaki bomoi oyo lobi mpo na kokende kozala elongo ná Nkolo Yesu. Na matánga na ye, Reverend M. Mckinney akoteya, mokolo ya mosala moko, kala, azalaki, mokengeli ya lingomba Metodiste na—na Port Fulton mpo na mibu mingi, azalaki moninga na bango mpenza. Mpe nasengeli kosunga ye, mokolo mwa Yambo, na, nabanzi ezali na ngonga moko na ndambo, na—na ndakonzambe ya Charlestown, na Indiana. Mpe bino nyonso, baninga ya libota Colvin bako, nayebi, bakosepela bópesa bango mwa mpiko to . . . mwa mbote ya loboko. Mpo biso nyonso toyebi oyo yango ezalaka, biso baoyo toleká na makambo yango, na mabwakú yango, biso moko, mpe toyebi ndenge kobungisa moninga esalaka. Na boye biso . . . Azali na kati ya—na kati ya ndakonzambe yango sikawa, na Charlestown, na Indiana. Soko bokei kuna na nsima ya nzánga oyo, ee, nandimisami ete libota Colvin bakosepela na yango mingi. Bato na bango mingi bayaka awa na tabernacle kino lelo. Nabalísá, nakundá, nabatísá, pene na libota na bango mobimba.

Na boye M. Grayson, oyo azaláká mozalani na biso awa, ye nde abongisaka bibembe kuna.

<sup>508</sup> Na bongo, na mpokwa ya lelo, soko Nkolo alingi, esika tokokata na ntongo oyo, tokomeka kokoba na mpokwa ya lelo, na boyekoli monene oyo tozali koyekola sikawa. Na bongo, nakanisi ete yango nde mayebisi yango, na—na boyebi na—na ngai nyonso. Mpe mokolo ya Misato oyo ezali koya, na mpokwa, nde, tokoyebisa mpokwa oyo tokokende kozala elongo na Ndeko Graham.

<sup>509</sup> Mpe totómbeli bapaya nyonso boyei bolamu epai na biso. Mpe tozali na esengo ya koyamba bino awa na ntongo oyo, mpe tobondeli ete Nzambe ápambola bino lelo, na ndenge ya kofuluka, mpo na liyangani oyo.

<sup>510</sup> Ndeko Cox auti koyebisa ngai ete bisalelo ya koyokisa mongongo ezalaki kosala mpenza malamumu te na ngonga oyo. Ntango mosusu ezali, ekoki kozala mpo mopepe ezali malamumu te, londendé ezali mingi na kati ya ba-baffle kuna. Mpe ezali lisusu malamumu mpenza te, mpo na kobanda, boye, yango nde ekoki kozala ntina.

<sup>511</sup> Wana nazali komona ndeko mwasi moko oyo nayebi afandi awa, Ndeko mwasi Arganbright, ngai . . . Ezali mpenza e—ezaleli malamumu te, kotuna yango, kasi, osili koyoka nsango ya Ndeko Arganbright banda akómi kuna? Nazali mpenza na mposa ya koyoka nsango na ye na lombangu. Azali na Suisse mpe na Allemagne, na mayangani moko kuna, elongo ná Ndeko Tommy Hicks mpe Paul Cain. Soki otikali koyoka yango, Ndeko Mwasi Ruth, óyebisa ngai na mbala moko, na lombangu nyonso.

<sup>512</sup> Sikawa, mwa tabernacle oyo ezali na bandeko ya losambo te, kasi tozali na boyokani na bondeko. Tozali na endimeli mosusu te bobele Klisto, mobeko mosusu te bobele bolingo, buku mosusu te bobele Biblia. Yango nde Buku bobele moko oyo biso toyebi, mpe eloko bobele moko oyo biso toyebi, oyo tozali na yango. Wana Makila na Yesu Klisto ezali kopetola biso na masumu nyonso, tozali na boyokani na bondeko bamoko na bamosusu, biso nyonso.

<sup>513</sup> Nazalaki kotala, na ntongo oyo, bamosusu kati na bino ntango mosusu bayokaki ndeko kobondela. Azalaki Mokatoliko, boye, to azaláká Mokatoliko. Mpe tozali na bato ya ndenge na ndenge oyo bayaka awa. Nauti kozua libaku malamumu, kala mingi te, ya kopesa mbote ya loboko na ndeko mobali moko ya Menonite, oyo afandi awa. Bázala ba-Menonite, ba-Methodiste, ba-Batiste, mpe ba-Katoliko, bato nyonso oyo balingi, tika ete báya. Mpe tosonianaka na bondeko elongo zinga-zinga na mapamboli ya Liloba na Nzambe. Ba-Témoin de Jéhovah bafandi awa na nganga oyo, mpe bato ya ndenge na ndenge, boye, ya ba-denomination ndenge na ndenge.

514 Nazaláká kolinga (ee, kino lelo) Westi. Nalingaka bampunda mpe bangombe. Nakólá na elanga ya ebokwelo moko, mpe na—nalingaka yango. Mpe tozaláká kosangisa bibwele, mpe nazalaki kokende elongo na bango. Mpe tozalaki na lopango ya banyama. Nayebi te soko bino bato ya Esti boyebi nini lopango ya banyama ezali, to te. Ezali ntango batiyaka bangombe na kati ya—ya zamba, basalaka lopango moko mpo na kobatela bango bápalangana te, ndenge bazalaki kobenga yango, bázonga na ebokwelo te. Bazalaki kolia matiti, epai bazalaki kolona matiti mpo na koleisa bango na eleko ya hiver. Bongo kuna na ngomba, bazalaka mpe na mapango ya banyama, epai bakabolaka nyama mingi ya basi ná ya mibali, mpe bongo na bongo. Babengaka yango lopango ya banyama. Kasi lopango ya monene ezalaka na esika mobateli atelemaka, wana bangombe bazali koleka.

515 Mpe nasila kofanda kuna, mikolo mingi, likoló ya kiti ya mpunda, mpo na kotala ndenge bangombe bazalaki koleka. Bilembo ya ndenge na ndenge ezalaki kokota kuna. Bamoko bazalaki na nkombo ya “Diamond.” Bamosusu bazalaki na nkombo ya “Bar X.” Mpe bamosusu. . . Oyo ya biso ezalaki “Tripod,” eloko moko lokola elembo ya Boy Scout. Oyo elandi, na nsé na yango, ezalaki “Turkey Track,” likoló na mpúnda. Mpe bango nyonso bazalaki na bilembo ya ndenge na ndenge, mpo na—mpo na koyeba bangombe na bango, ntango bazalaki kobimisa bango.

516 Sikawa, mobateli azalaki mpenza kokipé elembo nini bazalaki na yango te, kasi, mobateli azalaki nde kotala etikete oyo bazalaki kobamba na litoi na bango. Nyonso ezalaki kokota kuna, ata soko ezalaki elembo nini, esengelaki kozala ngombe ya Hereford ya solosolo. Ekokaki kokóta kuna te, soko ezali ya Hereford te. Esengelaki kozala bangombe oyo esilaki kokomama, soki te, ekokaki koleka te.

517 Nabanzi, na mokolo wana ntango Nkolo akoya, akotala elembo oyo tozali na yango te, kasi soko biso nyonso tozali Baklisto oyo babotami mbala ya mibale. Ya solo. Bango nde baoyo ya Klisto. Lomeko ya Makila nde ekolakisa biso polele, ete biso nyonso tozali Baklisto. Mpe soko tokozala bongo *kuna*, ekozala malamau ete tozala bongo awa. Bokanisi bongo te? Ndenge wana, tosepelaka na bondeko nyonso ya mangomba nyonso ya ndenge na ndenge.

518 Sikawa tozali koyekola Buku oyo epambolami, ya Baebelé. Ndeko moko asepeleli na yango mingi na lolenge ete azui babande yango mpe azali kosala buku moko ya kotanga na ntina na yango.

519 Sikawa tolingi kokóma, kala mingi te, na mokapo ya 11. Tozali kozela kolekisa eleko ya hiver likoló na yango, na mokapo ya 11. Mpamba te bato moko na moko na bango, tokosepela kozonga na Buku mobimba mpo tókangisa Makomi

mobimba elongo. Nalingaki kosala yango. Nazali kosala yango ndambondambo, misusu ya oyo, ya mikapo ya liboso oyo, mpo na kokangisa Buku yango mobimba elongo. Mpamba te, bomoni, Likomi esengeli kotalisa polele Likomi.

<sup>520</sup> Na yango, soko kotelemelana moko ezali, oyo moto moko akokanisa ete Makomi etelemelanaka, wana ezali libunga. Ezali na Likomi moko te oyo etelemelaka Likomi mosusu. Ko—kotelemelana yango ezalaka epai oyo ntango mosusu Etelemeli ndenge na biso ya komona Yango, kasi Emitelemelaka Yango moko te. Nazali kokoba kati na mosala ya koteya, ekokisi mibu ntuku mibale na motoba sikawa, kasi natikalá te, ata mbala moko te, komona eloko moko na Biblia oyo etelemeli eloko mosusu oyo ekomami na Biblia. Mpe na—nayebi mpenza ete ezali kuna te.

<sup>521</sup> Mpe lelo tozali koyekola moko na mikapo oyo epambolami koleka ya Baebete, mokapo ya 7. Mpe soko ezali na moto moko oyo azali na Biblia te, oyo akolinga kolanda biso na botangi, tokosepela koyela yo Biblia, soko okolinga bobele kotombola loboko. Nakosenga ete moko na bampaka, moto moko, áya awa kozua mwa ndambo. Bayike batomboli maboko kuna na nsima. Matondi, ndeko. Soko ozali na mposa ya Biblia, tombola kaka loboko, bakomemela yo yango.

<sup>522</sup> Sikawa, nzela bobele moko oyo lingomba ekoki kotongama, nzela bobele moko oyo moto akoki kozala na Kondima, ezali na nzela na denomination na ye te, na nzela na kokota na ye na lisanga moko te. Kasi Kondima na ye épema te likoló na likindo ya makanisi ya moto moko boye, mpo nyonso wana ezali kaka moto, ata ndenge nini. Kasi nzela bobele moko oyo Kondima ekoki kozua esika na yango ya kopema mpenza, ezali likoló na Liloba na Nzambe oyo eninganaka te mpe ebongwanaka te. “Kondima eutaka na koyoka, koyoka Liloba.” Ndenge wana nde esengelaka. Mpe—mpe ntango Kondima eyokami mpe endimami, efandi ngwi mpo na libela. Eloko moko ekoki lisusu koningisa yango te, ata soko nini eyei. Eloko moko te ekoki lisusu kobongola Kondima yango. Bókanisa yango. Obwaki lóngo, mpe okobongwana lisusu te, mpo na ntango mpe na Seko. Obwaki lóngo mpo ya libela, “Mpo ete Nzambe, na mbeka bobele moko, abongisi be, mpo na libela, baoyo babulisami, to babengami.”

<sup>523</sup> Mpe Kondima ezali na esika monene na bomoi ya Moklisto, ya mondimi, na lolenge ete ekoki kotelema mpembeni na nkunda ya potopotó to likoló na sanduku ya ebembe, epai bebé moko ya motuya to molingami moko atiki bomoi oyo, akei na ngámbo. Mpe na etaleli moko ya nsomo ya liso ya mpongo, akoki kotala Ye oyo alobaki: “Nazali Lisekwa mpe Bomoi.” Mpe babosani makambo ya kala. Bakómi kopota mbangu kino na ebiangeli oyo eleki likoló.

524 Nazali na esengo mingi ete Nzambe asili kopesa yango, mpe asili kokomisa yango likabo ya ofele mpo na moto nyonso. Yango nde oyo mangomba esengeli kozala. *Mangomba* elingi koloba te ba-denomination to bibongiseli; elingi koloba, “Bitonga ya bato, ya bandimi, oyo basangani na nsé ya bondeko ya Liloba.”

525 Mpe kati na malakisi malamungu mingi oyo, ya Santu Paulo, na mibóko, na mikapo ya liboso, azalaki mpenza kolobela Bonzambe oyo eleki likoló ya Nkolo Yesu mpe Nani Ye azalaki. Klisto azalaki Nzambe, asalemaki na lolenge ete bato bakoka koyoka Ye na nzoto, komama Ye, mpe—mpe kozala na bondeko elongo ná Ye. Klisto, Nkolo Yesu, azalaki nzoto oyo Nzambe afandaki kati na yango: “Nzambe akómaki mosuni mpe afandaki elongo na biso.” Timote ya Liboso 3:16: “Na ntembe te libombami ya bonzambe ezali monene, mpo ete Nzambe amonisamaki kati na nzoto.”

526 Jehovah monene akitaki na nsé mpe akomaki eloko ekoki kosimbama, na kobikáká kati na nzoto ya Mwana na Ye Moko, kotatoláká mpe kozongisáká mokili na boyokani na Ye moko. Nzambe azalaki moke te. . . Klisto azalaki moke te koleka Nzambe, mpe—mpe Nzambe azalaki moke te koleka Klisto. Bango mibale elongo basalaki Bonzambe kati na nzoto, asalemaki mwa moke na nsé na Banje, mpo ákoka konyokwama. Banje bakokaki konyokwama te. Yesu azalaki Mongombo oyo Nzambe afandaki na kati.

527 Biblia elobi, na mokapo ya 7 ya Misala ya Bantóma, ete, “Mingombo, mpe kotumb- . . . mbeka mpe makabo ya kotumba, Olingaki yango te, kasi Osili kobongisela Ngai nzoto. Nzokande Oyo-Aleki-Likoló akofandaka na mingombo etongami na maboko na bato te, kasi Osili kobongisala Ngai nzoto,” bongo kofanda kati na mongombo to kouwela na boyokani kati na bondeko elongo ná moto.

528 Soki Nzambe apesi nzela, kaka ntango tokosilisa mokapo oyo, to ntango tokosilisa Buku oyo, tolingi kozonga mpe kozua Buku ya Luta mpo na kotalisa na kati kuna ndenge Nzambe akómaki ndeko na biso, mpo na kozongisa babúngi na bondeko ná Ye moko na nzela na kosala boyokani kati na bondeko mpe kokóma moko elongo ná biso. Mosikoli asengeli kozala ndeko, mpe nzela bobele moko oyo Nzambe akokaki kokóma ndeko na biso, ezali kokóma moko elongo ná biso. Boye, Akokaki kokóma Mwanje te mpe ázala ndeko ya moto.

529 Na mpokwa eleki, ntango nazalaki kosolola na mwana mobali oyo motema na ye etutami, moninga na ngai, oyo mama na ye auti kokufa, alobaki: “Oh, Ndeko Bill, nabanzi ete azali Mwanje na mpokwa oyo.”

530 Nalobaki: “Te, Earl. Akokómáká Mwanje te. Azali mwasi, na mpokwa oyo, bobele ndenge Nzambe asalaki ye, mpe akozala ntango nyonso bongo, Mwanje ata moke te.” Nzambe asalaki

Banje. Atikalá kokela bato mpo bákóma Banje te. Akelaki Banje mpe bato. Boye, bato bakokómáká Banje te, mpe Banje bakokómáká bato te. Nzambe asalaki bango ya kokesene.

<sup>531</sup> Sikawa, mpe Klisto na kokómáká mosuni mpo na kosikola uta na ngámbo monene wana, epai moto akweaki, mpe bozangi kufa wana oyo abungisaki, na nzela na lisumu, na bongo Nzambe akitaki na nsé mpe azuaki lolenge ya moto, mpe akómaki ndeko na biso, mpo Ákoka komema masumu na biso mpe kufa na biso.

<sup>532</sup> Mpe na moko na bitaliseli oyo tozalaki kopesa, na mateya oyo elekaki liboso, ezali kaka mwa mobóko mpo baoyo bayei sika básosola. Nzambe, na nzela na Ye kokende na Kalvari, wana esweli ya kufa ezalaki likoló na Ye, mpe ezalaki kosala makelele zinga-zinga na Ye, mpe suka-suka eswaki Ye, kino Akufaki. Akufaki na lolenge ete mói etikaki kongenga. Akufaki na lolenge ete sanza mpe minzoto elingaki kopesa pole na yango te.

<sup>533</sup> Mpamba te, Asengelaki mpenza kosala yango, mpo na kokotisa esweli ya kufa! Soko Ázalaka moto oyo akoki kokufa te, soko Ázalaka kati na Théophanie, to kati na Molimo, kufa ekonzaka yango te. Esengelaki kokóma nzoto, ete Ákoka koyamba esweli ya kufa. Kasi soki nzói to mwa nyama oyo eswaka, soki kaka aswi na bozindo mpenza, akoswa lisusu te. Atikaka esweli na ye na kati ya nzoto. Mpe yango nde oyo Klisto azal- . . . to oyo Nzambe akómaki. Klisto afandaki kati na nzoto, mpo Ákoka kokotisa esweli ya kufa na nzoto na Ye moko. Mpe ntango kufa etikaki Ye, na ekulusu, etikaki esweli na yango, ekoki koswa mondimi lisusu te. Ekoki kosala makelele, ekoki konguluma mpe kobangisa, kasi ekoki koswa te. Ezali na esweli te.

<sup>534</sup> Santu Paulo monene, ntango azalaki kokende kokufa, agangáki mpe alobaki: “E kufa, wapi esweli na yo? Mpe nkunda, wapi elonga na yo? Kasi matondi na Nzambe Oyo apesi biso elonga na nzela na Nkolo na biso Yesu Klisto, mpamba te kufa ná nkunda esili kobungisa nguya na yango.”

<sup>535</sup> Sikawa, na bongo, mokolo ya Lomingo eleki, tozuaki: “Wana totiki makambo mike ya mateyo ya Klisto,” na mokapo ya 6, totangaki oyo: “tókende liboso kino na bobongi be.” Mpe tomonaki ete bato, lelo, na mangomba ebele, elongo na Branham Tabernacle mpe misusu ndenge na ndenge, topesaka motuya mingi na koyekola makambo mike ya malako na Klisto: Azalaki Mwana ya Abraham, Azalaki Mwana ya—ya *Songolo-pakala*, mpe bongo, kozonga na bakitani. Kasi Biblia elobaki: “Tótia biloko wana mpembeni, mpe tókende kino na bobongi be.”

<sup>536</sup> Osengeli liboso koyeba mateyo, na nsima nde osengeli koyeba makambo nyonso oyo; na bongo, tótia yango mpembeni, ndenge alobaki, makambo ya lisekwa ya bakufi, kotielá babeli maboko, mabátisi, mpe misala na kufa nyonso wana ya nzambe. Ata bongo, e—ezali na Bomoi kati na yango te. Kasi lingomba,

lelo, ezali naino kolanda makambo wana: “Oh, biso tondimaka Bonzambe ya Klisto.” Iyo. Ya solo. “Biso tondimaka libatishi na mai.” Iyo. Ya solo. “Kotiela babeli maboko.”

<sup>537</sup> Paulo alobaki: “Tokosala nyonso oyo soko Nzambe apesi nzela. Kasi na kotala nyonso wana, tótia yango mpembeni sikawa, mpe tókende kino na bobongi be.”

<sup>538</sup> Sikawa, lingomba ekoki kobonga be te na nzela na bibongiseli. Ekendeke nde mosika na Nzambe, ntango nyonso, to mosika moko na mosusu. Totiaka bipekiseli, tokabwanaka, lokola ete tozali na Kondima te. Kasi, na nsima, ntango totikaka malako ya malakishi yango, soki tokobi kino na bobongi be, na nsima makambo mike mike wana ekomaka lisusu na ntina mpenza te.

<sup>539</sup> Tokoti na boyokani, mpe tomoni ete nzela bobele moko oyo tokoki kobonga be ezali kozala kati na Klisto. Mpe tomoni bongo, na nzela na malakishi ya Biblia, ete ndenge nini bakotaka kati na Klisto; ezali na libatishi na mai te, na kotiela moto maboko te, na malakishi te. “Kasi na Molimo moko, biso nyonso tobatisami kati na Nzoto moko mpe tobongaka be na nzela na monyoko na Ye.” Bongo, tokómaka ndenge mosusu. Tokanisaka ndenge mosusu. Tosalaka makambo ndenge mosusu. Tobikaka ndenge mosusu. Ezali te mpo ezali lotomo to mpo tozali bandimi ya lingomba, kasi mpo na “bolingo oyo Nzambe asili kosopa na mitema na biso na nzela na Molimo Mosanto,” nde ekomisi biso bandeko bana-mboka ya Bokonzi na Nzambe, na ntango wana denomination to bipekiseli ezali te kati na yango. Bisu nyonso tozali Nzoto moko ya monene.

<sup>540</sup> Sikawa tobelemi mpo na kokota na liteya ya ntongo oyo, na mwa ngonga. Likambo moko lisusu nalingaki kokóma na yango awa, ezali ete, Paulo moto azali koloba kati na Buku, na mokapo ya 7, to, ya 6, tomoni awa ete tobongaka be nde kati na Klisto. Na nsima, na molongo ya 13 ya mokapo ya 6, mwa mobóko.

*Mpo ete wana etielaki Nzambe Abalayama elaka, Asimbaki ndai na ye moko jambi ajalaki na mosusu te oyo aleki ye monene ete asimbaki ndai mpo na ye,*

Nzambe akataki ndai na Ye moko, mpo Akokaki kokata ndai na mosusu te oyo aleki Ye monene.

<sup>541</sup> Sikawa tolingi tozonga nsima. Tózua Bagalatia kaka mwa ngonga. Tózonga na Buku ya Bagalatia, mpe tózua Bagalatia 3:16. Mpe tokotángá awa mwa moke, oyo Ye akatelaki ndai.

*Elaka esalami epai na Abalayama mpe na mobotami na ye. Alobi te ete, Mpe na babotami na ye, bango mingi; kasi epai na moto moko ete, . . . na mobotami, ye wana Klisto.*

<sup>542</sup> Sikawa soki botali malamau, kotángáká yango na bokebi sikoyo, wana ozali kotángá.

*...epai na Abalayama mpe na mobotami na ye  
(booko) bilaka (boike) bisalemi.*

543 “Abraham mpe Momboto na ye.” Sikawa, Momboto ya Abraham ezalaki moko, elingi koloba Klisto; kotalisa liboso, Yisaka.

Kasi Abraham azalaki na bana mingi. Azalaki na mwana moko liboso ázua Yisaka, oyo ezalaki kotalisa libunga ya kozanga kondima ya Sara oyo alingaki ete Hana ábota mwana yango, kokanisáká ete akómaki mobange mingi, mpe ete Nzambe ázunguluka yango mpe ásala ndenge mosusu libanda na ndenge oyo Asilaki kolaka ete Akosala yango.

544 Kasi Nzambe abatelaka elaka na Ye. Ata soki emonani bolema ndenge nini, Nzambe azuaka mokumba ya elaka na Ye. Mpe Sara akanisaki ete, ntango mosusu, akokaki kozua Hana, to, Agala, kútu, mosali na ye ya mwasi, mpo ábota mwana na nzela na Abraham, bongo akozua ye. Mpe wana ekómaki Isamaele, oyo azalaki nzube kati na nzoto, banda wana kino sikoyo. Azali nzube kati na nzoto kino lelo, mpamba te uta na wana nde ba-Arabe bayaki, mpe bazalaka ntango nyonso ndenge wana.

545 Sikoyo, ntango nyonso oyo ozangaka kondima Liloba na Nzambe polele oyo mpe olandaka nzela mosusu, ekozala nzúbe na nzoto na yo kobanda wana. Kamata kaka oyo Nzambe alobaki. Soko Alobaki Yango, yango nde oyo Ye alingi koloba. Oh, Nkombo na Ye épambolama! Kamata kaka Liloba na Ye.

546 Ata soki eloko nini emeki koleka mpembeni, koloba: “Ee, Elingi mpenza koloba Bongo te.” Elingi bobele koloba oyo Yango elobi, na ntango Nzambe apesi elaka.

547 Sikawa soko totali na bokebi mpenza.

*...bilaka esalami epai na Abalayama mpe na  
mobotami na ye...*

Moko azalaki Momboto, booko, mpe mosusu azalaki bilaka. Bilaka bizali ebele, mpe bato bazali ebele, baoyo bazali kati na Momboto ya Abraham. Bomoni? Momboto ezali moko, kasi bato ebele bazali kati na Momboto yango. Bomoni? Ezalaki kaka Abraham ye moko te, to epai na Yisaka ye moko te. Kasi mo... Ezalaki epai na Momboto mobimba ya Abraham. Elaka yango epesamaki epai na momboto moko na moko kati na Momboto yango. Bososoli yango?

548 Na yango, biso, lokola tosili kokufa kati na Klisto, kokokana na Makomi, tokamati Momboto na Abraham mpe tokómi basangoli ya libula kokokana na elaka yango. Ezali te na kokotáká na lingomba, to na kosaláká misala ya kufa, to—to bongo na bongo. Kasi na kobotamáká na Molimo na Klisto, nde tozali Momboto ya Abraham, mpe tokomi basangoli na libula elongo ná Ye kati na Bokonzi.



549 Boye tozali kokoba, kotánga, na bongo, kaka mwa moke liboso sikawa: “Nzambe azokata ndai.” Sikawa molongo ya 17 ya mokapo ya 6.

*Bongo, elingaki Nzambe mingi ete . . .*

*. . . Nzambe, ete atalisa epai na bazui na elaka ete mokano na ye ekobongwana te, asalaki yango na ndai:*

550 Oh, tópema sikawa miniti moke. “Nzambe alingaki mingi.” Ezali te ete Asengelaki kosala yango, kasi mpo na kondimisa likambo oyo mpenza.

551 Sikawa, tosili komona ete Nzambe akómaki nzoto, afandaki elongo na biso, ete Amitalisaki Ye moko epai ya mokili. Ntango Akutaki mwasi oyo na ekobo, Alobaki: “Ngai—Ngai nakweisi yo te. Kende, kosala lisusu lisumu te.” Ntango Akutaki babeli, Asalaki mpenza ndenge Asengelaki kosala, mpamba te Azalaki Nzambe, mpe A—Abikisaki babeli. Asekwisaki bakufi. Alimbisaki masumu. Ata soki bazalaki ndenge nini, mpe motango boni, mpe bazongaki nsima ndenge nini, Alimbisaki bango, ata bongo, soko bazalaki na mposa ya koya kosenga yango.

552 Sikawa bótala. Soki Nzambe asalaki na mbala moko na likambo moko boye, soki likambo wana moko eyei lisusu, Asengeli kosala mbala ya mibale ndenge Asalaki mbala ya liboso, soki te Azali sembo te. Bomoni? Ata soki ozali kati na masumu ndenge nini, ata soki ozindi kuna ndenge nini, Asengeli kosala epai na yo ndenge Asalaki epai ya mwasi oyo akweaki, soki te Asalaki libunga na ntango wana. Ezaleli ya Nzambe ezali Bomoto na Ye, mpe oyo Ye azali kati na ezaleli na Ye, etatolaka Bomoto na Ye.

553 Mpe wana nde lolenge oyo yo ozali, kati na ezaleli na yo ya bomoi, etalisaka oyo yo ozali. Ndenge tomonaki mpe toyekolaki, liteya moko to mateya mibale esili koleka, ba-Metodiste balingaki koloba: “Ntango ogángi, ozui Yango.” Ba-Pantektotiste balobaka: “Ntango olobi minoko na sika, ozui Yango.” Shaker alobaki: “Ntango olengi, ozui Yango,” ba-Shaker ya Pennsylvanie. Mpe tomoni ete bango nyonso bazali na libunga. Bomoi na yo nde etatolaka Yango. Bomoto na yo nde etatolaka oyo ozali. Moto ayebanaka na misala na ye, mpe oyo nyonso bomoi na yo ezali.

554 Bosilá koyoka lisolo ya kala oyo: “Bomoi na yo elobaka makasi mingi, nazoyoka maloba na yo te.” Boye nyonso oyo ozali, ozali bongo. Bomoi oyo obikaka nde etalisaka lolenge ya molimo oyo ezali kati na yo.

555 Na bongo okoki komekola eloko ya mabe, to, komekola eloko ya malamú, tika náloba. Okoki komekola ki—Moklisto. Kasi ntango moko ekoya, wana ntango ekokóba, ntango mokumba yango ekokóma kiló mingi, na bongo ekolakisa oyo yo ozali.

Bayebaka makasi ya monyololo na lilondo na yango ya bolembu koleka.

<sup>556</sup> Ntango Klisto, Mwana na Nzambe, amekamaki, etalisaki oyo Ye azalaki. Solo mpenza. Na ntango oyo omekami, yango ekotalisa polele oyo yo ozali. Bomoï na yo etalisaka ntango nyonso oyo ezali na kati na yo. Wana ntango ékokóba, zalá na koyeba mpenza ete masumu na yo ézolanda yo te. Yango nde oyo tozali koluka koloba.

<sup>557</sup> Yesu alobaki, na Santu Yoane 5:24: “Ye oyo akoyoka,” ezali te ye oyo akolénga, ye oyo akoloba, ye oyo . . . “Moto oyo akoyoka Liloba na Ngai, mpe akondima Motindi na Ngai, azali na Bomoï na Seko, mpe akokoma na esambiseli te; kasi asili kolongwa na kufa mpe koingela na Bomoï.”

<sup>558</sup> Ezali kondima na yo. Mpe kondima na yo, oyo etatolami na bibebu na yo, ekotalisa na bato oyo bakoki koyoka, kasi bomoi na yo ezali polele liboso na bato nyonso. Boye, etali te boni boni omeki kobika *boye*, mpe kosala *boye*, ekosimba ata moke te. Esengeli kozala kati na yo. Yango nde mama na likambo ya lisolo yango. Kondima na yo moko na Klisto oyo asekwi, lokola Mobikisi na yo; ete Azali na loboko ya mobali ya Nzambe, Azali kosala na esika na yo na ntongo oyo, ndenge yo ozali kosala na esika na Ye awa lokola motatoli. Motatoli asengeli kosala na esika ya moto moko, kozua ngámbo na yo lokola motatoli. Mpe ndenge bomoi na yo etalisaka awa oyo litatoli na yo ezali kati na Klisto, etalisaka kuna mpe etalisaka awa. Mpe Azali kuna na likoló, ndenge oyo Ye azali mpo na yo, etalisaka kuna mpe awa. Boye ozali . . . Na kondima na yo nde obikisami, bobele na yango. Boye, boléngi, bakoningana, mayóki, ata nini, ezali na esika ata moke te kati na Yango. Sikawa, ezali te . . .

<sup>559</sup> Sikawa, bókanisa mabe te, ete nandimaka bakoningana oyo te. Solo mpenza. Kasi oyo tozali kolobela sikawa, ezali komeka kokotisa na mitó ya bato lelo, ezali bakoningana te. Zabolo azui makambo yango mpe akómi kobulunganisa bato makasi mpenza, kosala ete bákóma kotonga Seko na bango likoló na koningana. Kogánga, koloba minoko na sika, kokende na losambo mikolo nyonso ya Lomingo, kobika lokola Moklisto, wana ekozala na bozitó moko te mokolo wana. “Soko moto abotami mbala na mibale te.” Mpe bomoi na yo etalisaka ndenge ozali na kati, bomoni, bakoningana na yo te.

<sup>560</sup> Okoki kozala na makila na maboko na yo, okoki koloba minoko na sika, okoki kobikisa babeli, okoki kolongola bangomba ná kondima na yo, kasi ozali kaka mpamba. Bakolinti ya Liboso 13. Bomoni? Esengeli kozala eloko moko oyo esalemi na Mbotama oyo eutaka na Nzambe, mpe Nzambe atii mbotama ya sika kati na yo, mpe apesi yo eteni na Ye moko. Na nsima biloko yango eyei. Okómi bokeli ya sika. “Napesi bango oyo ya Seko.”

561 Toyekolaki liloba oyo “Seko.” *Libela* ezali “ntáká ya ntango.” *Seko* ezali libela, libela na libela, kasi Seko ezali bobele moko. Mpe tomoni ete bazuaka Bomoi na Seko, mpe liloba yango na lokota ya Greki ezali *Zoe*, elingi koloba “Bomoi ya Nzambe.” Mpe ozui eteni ya Bomoi ya Nzambe, yango nde ekómisi yo mwana na Nzambe na molimo, mpe ozali mpenza ya libela, kaka ndenge Nzambe azali ya libela. Ozali na nsuka te, na esika ya kosuka te, mpo ozalaki na esika te, mpo na kobanda. Eloko nyonso oyo ezali na ebandeli ezali na nsuka, mpe oyo ezangi ebandeli ezali na nsuka te.

562 Ndenge tolingaka mpenza Liloba ya motuya wana! Moklisto asengeli mpenza kotelema ngwi na Kondima oyo epesamaki na basantu mbala moko mpo na libela, kasi kotenga-tenga te, na esika moko kino na esika mosusu, mpe kokota na mangomba ndenge na ndenge. Lingomba nyonso oyo olingi kosambela ezali mabe te, na ntango nyonso oyo ózali Moklisto. Kasi tia liboso eloko ya liboso, oyo ezali Mbotama wana, oyo ekokómisa yo ndeko ya Nzambe, ndenge Nzambe akómaki ndeko na yo.

563 Akómaki ndeko, mpo Akoka kosekwisa yo. Liboso ete Akoka kosekwisa yo, Asengeli kopesa yo Bomoi na Seko. Na bongo Nzambe Asengelaki kokóma ndeko, mpo na kokamata kufa, mpo na kosekwisa yo. Boye, osengeli kokóma ndeko na Ye, mpo na kokende kino na lisekwa. Bomoni oyo yango ezali? Ezali kaka kozua esika ya mosusu. Nzambe akómaki yo, mpo yo ókóma Nzambe. Bomoni? Nzambe akómaki eteni na yo, mosuni, mpo yo, na ngolu na Ye, ókóma eteni na Ye, esili, mpo ózua Bomoi na Seko.

564 Ezali mpenza elili moko kitoko, mpe, oh, tolingaka yango.

Sikawa, *elingaki Nzambe mingi* . . .

565 Atindamaki kosala yango te, kasi Alingaki kosala yango. Nasepeli na yango mingi, ete Nzambe na biso alingi, boye te? Bótala. Bongo soko A—bongo soko Azalaki na motema molai te? Mbuma ya Molimo ezali nini? Bolingo, esengo, kondima, kimia, motema molai. Yango nde eteni ya Nzambe oyo ezali kati na yo. Mpe kokoka koyika mpiko, komemana mokumba bamoko na bamosusu. Kolimbisana, ndenge Nzambe, na ntina na Klisto, alimbisaki bino. Molimo na Nzambe kati na yo nde ekómisaka yo bongo. Na bongo, ntango Nzambe azalaki awa na mokili mpe akómaki yo, akómaki lisumu, ete Ye azuaki lisumu na yo, amemaki yango mpo na yo mpe afutaki etumbu na yo ya likambo yango. Nzambe azali na motema molai, amemaka mikumba na biso.

566 Na bongo, Azali Nzambe malamumu. Soko olingi ete makambo mosusu esalema na ndenge na yo, boyebi, Nzambe azali malamumu mingi mpo na kosala yango. Alingaka ko—kosepelisa yo. Azalaka na mposa ya ko. . . A—Azali bolingo, mpe bolingo na Ye monene

etindaka Ye kutu átika ntango mosusu, mpo na kopesa yo biloko oyo ozali na mposa na yango.

567 Bótala Toma, nsima na lisekwa. Toma alingaki kondima te. Oh, azali na bana ebele lelo. Kasi Toma alobaki: “Te. Te. Nasengeli kozala na ndanga. Nasengeli kokotisa maboko na ngai na mopanzi na Ye, mpe na ya Ye. . . misapi na ngai awa na maboko na Ye, liboso ete nándima Yango. Ngai, etali ngai oyo bino bolobi.” Bomoni, azalaki mpenza libanda na molongo ya Makomi, na ntango yango. Bosengeli kondima Yango. Boye alobaki: “Nasengeli kozua ndanga moko boye, mpo na kotalisa Yango polele.”

568 Mpe Yesu amonanaki, Azali malamumu: “Yaka, Toma, soko yango nde eloko olingi, ee, yango oyo. Okoki kozua yango.”

569 Tozalaka nde bongo. Tolobaka: “Nkolo, nasengeli koloba minoko na sika. Na—nasengeli kogánga. Nasengeli. . .”

570 “Oh, kende liboso, Nakopesa yo yango.” Azali malamumu.

571 Boye, atiaki maboko na mopanzi na Ye, bongo alobaki: “Oh, ezali Nkolo na ngai mpe Nzambe na ngai.”

572 Alobaki: “Sikoyo, Toma, ondimi banda omoni. Kasi libonza ya baoyo bazangi ndanga, kasi bandimi Yango, ezali monene koleka!” Yango mpenza. Tosengeli nde kokóma wana. “Libonza ya baoyo bamoni eloko te kasi ata bongo bandimi Yango eleki monene.” Ezali mosala ya kondima, ete tondimi Yango.

573 Sikawa, nandimaka ete bilembo elandaka bandimi, kasi tótiaka liboso makambo esengeli kotiyama liboso. Okoki kozala na bilembo, kozanga kozala na Oyo. Paulo moto alobaki bongo. Alobaki: “Nakoki koloba minoko na sika lokola bato mpe Banje; nazali mpamba. Nakoki kolongola bangómba na kondima na ngai; nazali mpamba. Nakoki kososola Biblia, na lolenge ete nakoki koyeba mabombami nyonso ya Nzambe; nazali mpamba.” Bomoni, wana ezali makabo ya Molimo Mosanto, kozanga Molimo Mosanto.

574 Molimo Mosanto azali Nzambe. Nzambe azali bolingo, esengo, kimia, motema molai, boboto, motema mpiko. Yango nde Molimo na Nzambe. Yango nde Nzambe atelemisi na mikolo ya nsuka, na nzela na Molimo wana.

575 Sikawa: “Alingi te. . .”

. . . Nzambe, alingaki mpenza *mingi* kotalisa *epai* na *basangoli* na *libula* ya *elaka* . . .

. . . Nzambe, alingaki mpenza . . . kotalisa . . . *basangoli* na *libula* . . .

Basangoli na libula yango nde banani? “Biso, lokola tokufi kati na Klisto, tokómi Momboto ya Abraham, mpe tokómi basangoli na libula.” Oh, ezali kokóta malamumu? Tozali basangoli ya libula ya Bokonzi na Nzambe, na nzela na elaka ekatamelami

ndai. Nzambe atindamaki kokata ndai te. Liloba na Ye ebongi be. Kasi Akataki mpe ndai, na Ye moko, mpamba te oyo aleki Ye azalaki te.

576 Wana tókobi kotánga, mwa moke, bóyoka.

*. . . ya elaka ete mokano na ye ekobongwana te, atii ndai:*

577 “Kobongwana te,” oyo ebongwanaka te. Nzambe akoki kobongwana te. Asengeli kotikala lolenge moko. Mpe soko Nzambe abikisaki mobeli moko, Akoki kobongola lolenge na Ye te. Soko Nzambe alimbisi mosumuki moko, mwasi ya ndumba moko, Akoki kobongola lolenge na Ye ata moke te. Kozanga kobongwana, Liloba na Nzambe oyo ebongwanaka te. Nzambe alobaki, na esika moko: “Nazali Nkolo Oyo abikisaka malali na yo nyonso.” Asengeli kokangama na Yango, mpamba te Azali na nsuka te. Ayebaki nsuka uta na ebandeli.

578 Sikawa, ngai nakoki koloba: “Nakosala *boye*.” Kasi Biblia elobi, tosengeli koloba: “Soki Nkolo alingi.” Mpamba te, ngai nazali moto oyo akufaka. Nayebi te. Bantango mosusu nasengelaka kobongola maloba na ngai, kasi Nzambe akoki kobongola oyo ya Ye te. Azali Nzambe.

579 Mpe Asengeli bobele likambo moko: “Soko okoki kondima.” Oh, la la! “Soko okoki kondima, nyonso ekoki kosalema.” “Soko okoki kondima,” esili. “Yo, soko okoki,” yango nde motuna. Kasi motuna yango etali Liloba ya Nzambe te, mpo kozanga kobongwana na Ye, Akoki kobongwana te. Oyo kitoko mingi!

580 Sikawa bóyoka, wana tokobi kotánga.

*Ete mpo na makambo mibale mayebi kobongwana te, oyo Nzambe akoki komimonisa na lokuta kati na yango te, . . .*

Ekoki kosalema te! Oyo ekoki kosalema te mpe kobongwana te ezali mpenza liloba moko; ekoki kobongwana te, ekoki koningana te. Esengeli kotikala ndenge moko mpo na libela. Ekoki kobongwana te, oyo ebongwanaka te mpe oyo ekoki kosalema te.

*Mpe mibale, na makambo mibale mayebi kobongwana te, oyo Nzambe akokaki komimonisa na lokuta kati na yango te, . . .*

“Tozali na makambo mibale?” Iyo. Ya liboso, Liloba na Ye elobi ete Akosala yango. Ya mibale ezalaki ndai na Ye akataki likoló na yango, ete Akosala yango. Oh, la la!

581 Tosengelaki kozala bato ya ndenge nini? Mpo na nini tósengela kotenga-tenga mpe kopota mbangu, mpe kozuáká makambo ya mokili mpe kobika lokola Boklisto ya mobu 1957 ya mikolo oyo? Biso tolingi kozala bato ya lolenge ya kala oyo bazuaka Nzambe na Liloba na Ye, mpe ebengaka biloko oyo

bizalaki te, lokola ete bizali. “Soko Nzambe alobi bongo, Ekati likambo.”

582 Abraham, oyo elaka epesamaki epai na ye ná Momboto na ye, abengaki biloko oyo bizalaki te, lokola ete bizalaki. Mpamba te, Ezalaki elaka na Nzambe, koyeba ete Nzambe akokaki kokosa te. Alakaki ye yango, mpe ye andimaki Yango. Mpe wana mibu ezalaki koleka, mpe elaka yango emonanaki lokola ete ezalaki kotangwa mosika, na miso ya bomoto, Yango ekómaki pene na Abraham koleka.

583 Na esika ya kokoma na bolembu, mpe koloba: “Ee, ntango mosusu eloko moko lokola lobiko na nzoto kouta na Nzambe ezalaka te. Ntango mosusu nazali kaka koke- . . . Ntango mosusu eloko ya ndenge wana ezalaka te. Ntango mosusu nazalaki na libunga na makanisi na ngai nyonso.” Na bongo, wana elakisi likambo moko, ete obotami naino mbala ya mibale te. “Mpamba te ezali . . .”

584 Tolobelaki yango mokolo ya Lomingo eleki, kozonga kaka moke na mokapo yango. “Mpamba te ekoki kosalema te ete moto oyo asilaki koleta makabo ya Likoló mpe nyonso wana, ákwea, áya lisusu na kobongola motema.” Ekoki kosalema soko ata moke te!

Mpo ye oyo *abotami na Nzambe asalaka te* mpe akoki *kosala lisumu te; mpamba te momboto ya Nzambe efandi kati na ye: mpe akoki kosala lisumu te, . . .*

Momboto na Nzambe ezali Liloba na Nzambe. “Kondima eutaka na koyoka, koyoka Liloba: ‘Mbeka esilaki kopesama. Nyonso ekokisami.’”

585 Sikawa, soko osali mabe, Nzambe akosala ete ófuta mpo na yango. Kasi soko osali yango, ozali na libunga, osali yango na nko te. Mokapo ya 10, molongo ya 47, nabanzi: “Mpamba te soko tokosala masumu na nko nsima biso koyamba boyebi ya Solo.” Kasi nsima na yo kosila Kobotama, ozali na Solo; boyebi na Yango te, kasi ondimi Solo mpe Ekómi likambo ya solosolo. Mpe ozali mwana na Nzambe, na ntango mpe Seko. Nzambe akataki ndai ete Akosala yango.

586 Yesu alobaki: “Ye oyo akoyoka Maloba na Ngai, mpe akondima Motindi na Ngai, azali na Bomoi na Seko, mpe Nakosekwiya ye na mokolo ya nsuka. Akoleka ata moke te na kosambisama. Asili kolongwa na kufa mpe koiingela na Bomoi.” Sikawa ná ndai ya ndenge wana: “Nzambe alingi ete tóyamba Yango.”

587 Sikawa bótala oyo alobi awa, Paulo nde azali koloba na—na lingomba.

. . . ete *Nzambe akoki komimonisa na lokuta te, biso tosendeli kozala na kobondisama makasi, . . .*

Ezali te: “Ee, soko ba-Batiste basungi ngai malamau te, nakokende epai ya ba-Metodiste.” Bomoni?

*... biso tosengeli kozala na kobondisama makasi, baoyo toсили kokima mpo na kozua ekimelo kosimba elikia oyo etiami liboso na biso:*

588 Sikawa na botángi ya oyo ya nsuka.

*Tozali na elikia yango lokola lóngo na molimo, . . .*

*Elikia, ndai oyo Nzambe akataki, tozali na yango lokola lóngo na molimo, ekobukana te, ekotambola mpe te, ekoingela na katikati na oyo ezali na nsima na ezipelo;*

589 Tóloba mwa moke na ntina na “ezipelo.” Tolobelaki yango mpenza malamau te na mpokwa ya mokolo ya Lomingu eleki.

590 “Kati na ezipelo.” Ezipelo ezali mosuni. Ezipelo ezali eloko oyo epekisaka biso komona Nzambe, miso na miso, na lingomba oyo. Ezipelo ezali eloko oyo epekisaka biso komona Banje na bisika na bango na ntongo oyo, ndenge batelemi mpembeni na bifandelo. Ezipelo ezali eloko oyo epekisaka biso komona Ye. Tobombami nsima na ezipelo, mpe ezipelo yango ezali nzoto. Tozali bana mibali mpe bana basi ya Nzambe, tozali liboso na Bozali ya Nzambe: “Banje na Nzambe bakozingelaka baoyo bakobángaka Ye.” Tozali liboso na Bozali ya Nzambe, ntango nyonso. “Nakotika yo ata mokolo moko te, nakobosana yo mpe mokolo moko te. Nakozala elongo na yo ntango nyonso, kino nsuka.” Kasi ezipelo ezali mosuni, yango nde oyo ezali kotika biso libanda ya Bozali na Ye. Kasi na nzela ya elimo, Molimo, na kondima na biso, toyebi ete Azali kosenzela likoló na biso. Atelemi mpembeni na biso. Azali awa sikawa.

591 Kuna na Dotani, na ntongo moko, mobange mosakoli moko azingamaki na lipinga moko mpe mosali na ye abimaki mpe alobaki: “Oh tata, mboka mobimba ezingami na bapaya.”

592 Mpe Eliya atelemaki, mpe alobaki: “Tala, mwana, baoyo bazali ná biso bazali ebele koleka baoyo bazali ná bango.”

593 Ee, abetaki miso mpe atalaki zinga-zinga. Akokaki komona eloko moko te.

594 Alobaki: “E Nzambe, nakolinga ete Ófungola miso na ye, longola ezipelo.” Mpe ntango ezipelo ekweaki longwa na miso na ye, zinga-zinga ya mobange mosakoli wana ezalaki na makalo ya móto, bangomba ezalaki kopela Móto, ná Banje mpe makálo. Yango mpenza.

595 Oh, na bongo Geazi akokaki koloba: “Na—nasosoli sikawa.” Bomoni, ezipelo yango ekweaki. Yango nde epai epekiselo ezali.

596 Tala yango oyo. Bósimba yango makasi. Ezipelo ezali eloko oyo epekisaka biso kobika lolenge oyo tosengelaki. Ezipelo ezali eloko oyo epekisaka biso kosala makambo oyo tolingaka mpenza

kosala. Mpe Nzambe azipamaki kati na nzoto, mpe ezipelo yango epasukaki na biteni mibale. Mpe Nzambe akomaki Nzambe lisusu, mpe Asekwisaki ezipelo oyo Amibombaki Ye moko kati na yango. Yango nde lisekwa ya Nkolo Yesu. Kotalisáká biso polele ete kati na ezipelo oyo tobombami kati na yango sikawa, na kondima tondimi Yango mpe toyambi Yango. Mpe mokolo ezipelo *oyo* ekopasuka na biteni mibale, nakokende liboso na Bozali na Ye ná endimiseli oyo, koyebáká ete: “Nayebi Ye na nguya ya lisekwa na Ye.” Na Boyei ya Nkolo Yesu, ezipelo oyo ekosekwisama lisusu, na lolenge oyo ebongi be, kino nakotambola mpe nakosolola elongo na Ye lokola Mobikisi mpe Nzambe na ngai, ntango Akofanda na ngwende ya Dawidi. Mpe tokobika mpo na libela kati na ezipelo oyo nsima na yango kobongisama be, kasi ezipelo oyo ezali na lisumu kati na yango. Etali te soko ndenge nini. . . Bókanisaka nzoto ya nkembo wana na mabelé oyo. Esengeli kokufa, kaka ndenge elimo na yo esengeli kokufa, mpo na kobotama mbala ya mibale.

<sup>597</sup> Na oyo etali bobongi be, ezali te likambo ya kotika kolia misuni, mpe kosala *oyo* mpe kobongisáká nzoto be, bokozua yango ata moke te. Mpe osengeli kotika *oyo*, kosala *oyo*, kosala *oyo*, mpe kosala *oyo*, wana ezali mobeko. Wana ezali ba-legaliste. Bisu tondimaka lobiko na ndenge ya mibeko te. Tondimaka Yango ete tobikisami nde na ngolu. Mpe ezali yo te. Ozali na eloko moko ya kosala kati na yango te. Ezali kopona ya Nzambe nde esalaka yango. “Moto moko te akoki koya epai na Ngai soki Tata na Ngai abendi ye te.” Ya solo. Mpe Ye. . . Nyonso oyo Yesu ayaki kosala ezalaki kozua baoyo Tata ayebaki bango liboso; mpe abongisáká bango liboso na kozalisama ya mokili mpo bákóma bana mibali mpe bana basi ya Nzambe. Amen. “Ejali te ye oyo akopotaka mbangu, to ye oyo alingi, kasi Nzambe oyo akotalisaka mawa.” Nzambe nde asalaka yango. Okoki kobeta tólo te, ata moke te. Ezali na eloko moko te, oyo yo osálaki. Nzambe, na ngolu, nde abikisaki yo; yo moko te. Soko osali eloko, ozui eloko ya komikumisa na yango. Kasi ozali na eloko ya komikumisa na yango te. Lokumu nyonso ezongaka epai na Ye. Ezali Ye. Na nsima, Apesaki yo elikia ya solosolo: “Akataki ndai, ekoki kosalema te ete bana na Ye bábunga.”

<sup>598</sup> Sikawa, babetamaka fimbo mpo basalaki mabe. Okobuka oyo olonaki. Okozua yango. kokanisa te, ndenge obimaka mpo na kosala masumu, ete okozua etumbu na yango te. Soko osali bongo, mpe ozali na lolenge wana, elakisi ete otikalá kobotama mbala ya mibale te. Bososoli? Soko ozali naino na mposa yango kati na yo, ya kosala mabe, na bongo, ozali naino na libunga. Bomoni? “Mpamba te, Abongisi be, mpo na libela, baoyo bazali. . . Mpe banyama wana, na Kondimana na Kala, na mikolo ya mibeko, oyo bazalaki kopesama mbeka mobu na mobu, ntango nyonso, ekokaki kolongola masumu te.” Kasi ntango totii maboko na motó na Ye, mpe toyamboli masumu na



biso mpe tobotami mbala ya mibale na Molimo ya Nzambe, tozali lisusu na mposa ya lisumu te. Lisumu etiki yo. Ezali mpo na ntango mpe Seko.

<sup>599</sup> Okosala mabunga. Okokwea. Okosala mabe na nko. Okobima bantango mosusu mpe okosala makambo. Elingi koloba te ete obungi. Elingi koloba ete okozua etumbu.

<sup>600</sup> Mwana na ngai moke ya mobali, mbala mingi, bana na ngai, basalaka makambo. Baoyo yo bino, mpe. Ete yo. . . Bayebi ete etelemeli mibeko na—na yo. Mpe bayebi oyo ekokómela bango ntango basali bongo. Bakobetama fimbo mpo na yango, ntango mosusu fimbo ya makasi mpenza. Kasi ezali kaka mwana na yo. Ya solo mpenza.

<sup>601</sup> Ekoki kosalema te ete moto yango átikala kobunga lisusu, moto oyo abotámá na Bomoï ya Seko. Nzambe apesaka te bongo ázua yango lisusu. “Ye oyo akoyoka Maloba na Ngai, mpe akondima Ye oyo atindi Ngai, azali na Bomoï na seko; mpe akokóma ata moke te na Esambiseli, kasi asili kolongwa na kufa mpe koi ngela na Bomoï. Nakosekwisa ye na mikolo na nsuka.” Yango nde elaka na Nzambe.

<sup>602</sup> Sikoyo soko okobi, olobi: “Oh, ee, na bongo, nakoki mpenza kosala. . .” Ngai nasalaka ntango nyonso oyo nalingaka kosala. Kasi soki ozali Moklisto, okolinga kosala makambo ya mabe te, mpo na Bomoï mpenza oyo ezali kati na yo, mobóko na yango mpenza. Soki olingaka kosala mabe, elakisi ete likambo ya mabe ezali *awa* na kati. “Ndenge nini mai ya bololo mpe ya elengi ekoki kouta na liziba moko?”

<sup>603</sup> Boye, omikotisi na mobulungano moko boye ya komiyoka, to koningana *mosusu moko boye* ya kafukafu: Bósana yango! Zóngá na etumbelo mpe loba: “Nzambe, longola bomoi na ngai ya masumu ya kala, mpe tia ngai na lolenge moko oyo mposa na ngai mobimba. . .”

“Ye oyo abotami na Nzambe asalaka masumu te.” Ya solo. Azalaka na mposa ya kosala yango te.

<sup>604</sup> Ya solo mpenza, zaboló akotiela ye mitambo *bipai* na *bipai*, kasi na nko te. Biblia nde elobi bongo. Zaboló akotiela ye mitambo, mbala na mbala. Solo mpenza, akosala yango. Amekaki kotiela Nkolo na biso Yesu mitambo. Asalaki yango epai na Mose, mpe akangaki ye. Asalaki yango epai na Petelo, mpe akangaki ye. Asalaki yango epai na bato ebele, kasi. . . Petelo kutu awanganaki Ye, kasi nsima na yango, akendeki kolela na mawa mingi mpenza. Eloko moko ezalaki kati na ye.

<sup>605</sup> Ntango ebengá ekangolamaki na masuwa. . . Eyánganga abimaki, azalaki koganga *bipai* nyonso. Azalaki malamú na kati ya masuwa, kasi ntango abimaki, lolenge na ye ekómaki ndenge mosusu. Akokaki kolia bibembe nyonso oyo alingaki, mpe kosepela. Mpo na nini? Azalaki eyánganga, mpo na kobanda. Azalaki molei-bibembe. Azalaki na ntina te. Azalaki mokosi oyo

azalaki kofanda elongo na ebengá likoló na etape moko, azalaki monene lokola ebenga. Akokaki kopumbwa bipai nyonso ebengá akokaki kopumbwa. Kasi akokaki kolia bilei ya malamú oyo ebenga azalaki kolia. Na nsima, akokaki kolia bilei epolá, oyo ebengá akokaki kolia te. Mpamba te, ebengá atongámá ndenge mosusu. Asalémá ndenge mosusu. Azali ebengá. Mpe ebengá ekoki kogumbwa bilei epolá te, mpo ezali na mbuma ya bololo te.

<sup>606</sup> Mpe moto oyo abotami na Molimo ya Nzambe akómaka ebengá ya Nzambe, lolenge na ye, mbongwana na ye, kotongama na ye. Iyo, mesie. Soki otii molimo ya—ya ebengá na kati ya eyánganga, akokita lisusu likoló na ebembe ata moke te. Soki akiti likoló na yango na libunga, akolongwa wana noki-noki. Akoki koyikela yango mpiko te. Mpe moto oyo abotami na Molimo na Nzambe, akoki koyikela mpiko te. Akoki kokita na ndako ya milangwa na ntango moko boye, kasi akobima kuna nokinoki. Mwasi akoki kopengwisa ye, kobalola ye, kasi akobalola lususu motó na ye. Akolongwa wana nokinoki. Mpo na nini? Azali ebengá. Ya solo. Okobulunganisa ye te, mpamba te ayebi. “Bampate na Ngai bayebi Mongongo na Ngai, mpe bakolanda mopaya te.” Azali ebengá, mpo na kobanda. Yango nde oyo nazali kolobela, eloko moko mpenza, oyo ekangami na kati.

<sup>607</sup> Bótala malamú sikawa. “Nzambe akataki ndai.” Oh, yango. . .

*Elíkia oyo tozali na yango lokola lóngo ya motema, . . .  
kotelema ngwi, mpe oyo ekoti na—na oyo yango ezali ezipelo;*

<sup>608</sup> “Ezipelo.” Nzambe akitaki na nse, Azipamaki kati na nzoto. Mpo na kosala nini? Mpo na komitalisa Ye moko. Asengelaki komibomba, mpo tokokaki komona Ye te. Mpe Abombamaki na kati ya ezipelo yango. Mpe ezipelo yango ezalaki Nani? Yesu. “Ezali Ngai moto nasalaka misala yango te, Tata na Ngai nde,” elobaki Yesu. “Tata na Ngai afandi kati na Ngai. Nasalaka. Tata asalaka, mpe Ngai nazali kosala kino lelo.” Ye oyo lokola Moto oyo azipami, Azali kotambola kati na nzoto, Nzambe, Emanuele, Nzambe elongo na biso. “Nzambe azalaki kati na Klisto, kozongisáká mokili na bondeko na Ye moko.” Ye oyo, azotambola.

<sup>609</sup> Sikawa, Akitaki na nsé mpe apesaki kobulisama, to oyo esengelaki, to bolimbisi, mpo na nzela na mbeka ya kufa na Ye, Afutaki ntalo ya lisumu, mpo Ákoka koya lisusu mpo na kofanda kati na biso. Boye, kondima oyo tozali na yango ezali—ezali kondima oyo ezipami, to moto oyo azipami. Yango wana totalaka biloko oyo tomonaka kati na ezipelo yango te. Ezipelo yango ezali na mayele ya kelasi, esalaka makambo mpe elobaka makambo. Ezali likambo ya science. Kasi Molimo ya Nzambe na bomoi oyo efandi awa na kati, ebengaka biloko oyo ezali te,

lokola ete ezali, soko Nzambe alobaki bongo. Kozipama na yo yango wana. Tozali kati na ezipelo.

<sup>610</sup> Sikawa, mokolo moko Akosekwisa ezipelo oyo, ekobotama na mwasi te, na mposa ya nzoto ya mobali ná mwasi, kasi na mokano ya Nzambe, Akoloba mpe ekosalema. Bongo tokozala na nzoto lokola nzoto na Ye Moko ya nkembo. Tokozipama, mpo tókoka kosolola bamoko na bamosusu, kopesana mbote ya loboko.

<sup>611</sup> Sikwa, ntango tokolongwa awa, mongombo moko ezali, théophanie, ezali mpenza na elilingi ya moto, oyo eliaka te, emelaka te, elalaka te, elamúká mpo na libela. Kuna nde epai wapi tokendeke. Kasi bazali kozela na nsé ya Etumbelo, kogangáká: “Kino ntango nini, Nkolo? Kino ntango nini?” mpo na kozóngá awa. Mpamba te, bazali na mposa ya kopesana mbote ya loboko. Bazali na mposa ya kofanda mpe kolia, mpe kosolola bamoko na bamosusu. Bazali bato. Nkombo na Nkolo épambolama!

<sup>612</sup> Ntango Nzambe asalaki moto na elilingi na Ye Moko na ebandeli, Asalaki ye bongo. Azalaki na bondeko moko na mosusu, mpo toyebani bamoko na bamosusu. Tolingaka makambo oyo Nzambe asalaki mpo na biso, mpo tosalémá bongo. Na Boyei na Ye monene, baoyo babelemi bakozala bongo mpo na libela. Kozanga kufa, tokozala lokola Ye. Oh, Nkombo na Klisto épambolama!

<sup>613</sup> Sikawa tozali na ndangá ya lobiko na biso, wana tondimi Ye lokola Mobikisi na biso mpenza, Mobikisi ya nzoto na biso. Nyonso oyo ezali mafúti, to, mbano oyo efutamaka na lokasa ya assurance. Amen. Boyebi oyo lokasa ya assurance ezali. Okoki kozua mbano na yango kino ntango okokóma na motuya oyo boyokanaki. Ya solo mpenza. Bokoki kozua mbano. Mpe biso tozali kozua mbano sikawa. Bobele, likambo ezali ete, kaka na ntango oyo tozui mbano, lifuti yango etondi lisusu.

<sup>614</sup> Mokolo moko, mosali moko ya assurance alobaki na ngai: “Billy, nakolinga kotekela yo assurance moko.”

Nalobaki: “Nazali na yango.” Mwasi na ngai atalaki ngai.

<sup>615</sup> Sikawa, ezali te ete nalingaka assurance te. Kasi bato mosusu bakómá “babola likoló na assurance.” Boye, babalúká. Alobaki . . .

<sup>616</sup> Mwasi na ngai atalaki ngai, ndéngé: “Ozali na assurance?”

<sup>617</sup> Nalobaki: “Solo mpenza.” Ayebacki eloko moko te na ntina na yango.

<sup>618</sup> Alobaki: “Ee, Billy, ozali na assurance ya ndenge nini?”

<sup>619</sup> Nalobaki:

Assurance oyo epambolami, Yesu azali ya ngai!  
 Oo, ezali mpenza elengi liboso na nkembo ya  
 Nzambe!  
 Mosangoli ya lobiko, nasombami na Nzambe,  
 Nabotami na Molimo na Ye, nasukolami na  
 Makila na Ye.

620 Alobaki: “Ezali mpenza malamuni, Billy,” alobaki, “kasi yango ekopesa yo esika na lilita te.”

621 Nalobaki: “Kasi Ekobimisa ngai. Yango nde likambo ya motuya.” Nazomitungisa te mpo na kokóta kuna; nazomitungisa nde mpo na kobima.

622 Mpe uta nazuá assurance yango, na nzela na Nzambe ya Seko oyo akataki ndai, ete Akosekwisa ngai lisusu mpo na kokokana na Mwana na Ye, na mokolo ya nsuka, nakotambola na lipambu, nazali na libondisi mpe lóngo ya elimo, ete, wana nazali kati na ezipelo oyo, Eloko moko emonanaka te ekangisi lóngo na ngai makasi na Libanga ya bileko ngambo kuna. Ntango mai epumbwaka mpe epanzanaka, yango esalaka bokeseni moko te. Soki kufa, makámá, to soko nini, ekokabola biso na bolingo na Nzambe te. Lóngo na ngai esimbi makasi na kati ya ezipelo. Mpela éya. Ebeta na libongo. Bazangi kondima báya. Mondimi oyo abotami mbala ya mibale azali na lóngo. Ata bongo, bokoki komona oyo ezali na kati ya ezipelo oyo te. Kasi nayebi ete lóngo na ngai esimbi makasi Libanga ya bileko, Oyo akataki ndai mpe alakaki ete Akosekwisa ngai na mokolo ya nsuka.

623 Kokamwa te ete okoki kotala kufa na miso, mpe koloba: “Wapi esweli na yo? Nkunda, wapi elóngo na yo? Kasi matondi na Nzambe Oyo apesi biso elóngo na nzela na Nkolo na biso Yesu Klisto.”

Epai wapi *mobongisi-nzela* . . .

Oh, la la! Tokokóma na liteya yango te.

*Wana mobongisi-nzela . . . mpo na biso*

624 Mobongisi-nzela. Bosílá komona, na eleko ya westi ya kala (Nakátísá mwa ba-nzela ya kala wana mbala mingi.), mobongisi nzela, to scout? Ntango molongo ya makálo bazalaki kokufa, na kozanga mai, scout azalaki kopota mbangu na liboso. Mpe soko amoni bikólo ya ba-Indien; akozunguluka bango. Mpe soko amoni esika liziba ya mai ezali. Azalaki kozonga mbangu koyebisa mokonzi ya molongo ya makálo: “Bótambwisa bam-punda mbangu, moto nyonso áyika mpiko, mpamba te, bobele na ngámbo ya ngomba, liziba ya mai moko ya monene ezali kuna.” Azali mobongisi-nzela.

625 Mpe awa, Mobongisi-nzela. Mokolo moko zabololo akangaki moto nzela, na nsé ya mbula ya masisi, kasi Moto moko akangaki zála ya mitrailleterie yango. Ezalaki nde Yesu. Mobongisi-nzela asílá kokende liboso na biso. Mpe Satana atelemaki wana ná

mitraille, akangaki biso nzela, tozalaki ntango nyonso na boombo mpe tozalaki kobanga liwa. Azalaki kopekisa bato báya na Liziba yango. Ya solo, ezalaki bongo. Apesamaki etinda, mpamba te tosalaki masumu mpe tobenganamaki mosika na Yango. Kasi Mobongisi-nzela, Klisto, ayaki mpe abotolaki zála yango.

626 Bosilá koyoka loyembo ya kala wana: “Batela lopango, mpo Nazali koya?” Batela lopango, eloko te; tóbotola yango. Tolingi lisusu kobatela yango ntango molai te. Klisto azuaki lopango yango. Aleluya! Ekuke efungwani. “Liziba moko ezali polele na ndako na Nzambe, na engumba ya Dawidi, mpo na kopetola, mpo na bopeta ya bato na mbindo.” Mobongisi-nzela na biso asilá kokota mpo na biso.

627 Mobongisi-nzela, Ayebisi biso: “Esika moko ezali na ngámbo, kuna, epai wapi bokonuna ata moke te.” Epai wapi masusa ekozala na loposo te, epai wapi okozala lisusu na ntina ya kopakola biloko ya Max Factor te mpo mobali na yo ámona yo kitoko. Mobongisi-nzela asíli kokende liboso. Ezali ata moke te esika oyo banunaka, balembaka nzoto mpe baléngaka. Ezali na esika moko oyo okotikaláká kobéla te. Esika oyo bebé akozala na mpasi na libumu te. Esika oyo líno ya lokuta, to, líno ekolongwa te, mpo na kotia oyo ya lokuta. Aleluya! Oh, Nkombo na Ye épambolama! Aingelaki, mpe tokotelema na elilingi na Ye, bazángi kufa, mokolo moko kuna. Bakongenga koleka minzoto mpe moi. Ya solo mpenza. Mobongisi-nzela asíli kokende liboso na biso.

*. . . mobongisi nzela asili kokende, asili koingela mpo na biso, Yesu, ye nganga monene libela kobila molongo ya Melikisedeke.*

628 Mobongisi-nzela monene oyo asíli kokende liboso na biso, mpo na kofungola nzela. Akómaki, uta na Molimo, maziba minene ya monama ya Nzambe, Oyo azalaki na ebandeli te to nsuka te. Azalaki Nzambe, mpo na libela.

Bongengi ya Pole ebimaki. Ezalaki bongengi ya bolingo, yango nde oyo ya motuya monene, oyo ya motane. Langi mosusu elandi, ezalaki ya bleu; bleu, bosembo. Oyo elandaki, nsima na yango ezalaki balángi mosusu, balángi nsambo oyo ebongi be, oyo ezali Milimo nsambo ya Nzambe, oyo ebimaki longwa na Liziba monene to Diamá monene oyo Yesu alobelaki. Diamá monene yango epapámaki, mpo na kobimisa balángi yango. Nzambe akómaki mosuni mpe afandaki elongo na biso, mpo Ákoka kotalisa bolamu mpe mawa na Ye epai na biso, na nzela na makabo, bilembo mpe bikamwiseli. Monama monene yango ekomáki Theophanie, ya, ekómaki lokola moto, nzokande Azalaki moto te, Azalaki naino na nzoto te, Azalaki Theophanie.

629 Mose alobaki: “Nalingi komona Yo.” Nzambe abombaki ye na kati ya libanga.

630 Mpe ntango Alekaki, Apesaki Ye mokongo. Mose alobaki: “Ezalaki lokola mokongo ya moto.”

631 Na nsima likambo nini esalemaki? Mokolo moko kuna, ntango Abraham afandaki na kati ya hema na ye. Tokolobela yango, na mpokwa. Ntango Abraham afandaki na kati ya hema na ye, Nzambe ayaki epai na ye, na nzoto ya mosuni.

“Oh,” okoloba, “Ndeko Branham, azalaki . . .”

632 Tokomona Ye awa, kokutanáká na Abraham liboso na yango, na molongo ya Melekisedeke, na nzoto ya mosuni, yango ezalaki Nzambe. Ya solo, ezalaki bongo. Azalaki Nzambe kati na mosuni.

633 Okoloba: “Na bongo, Ndeko Branham, mpo na nini Ayaki lisusu kobotama?”

634 Abotamaki naino te na ntango wana. Akelamaki kaka, nzoto oyo Afandaki kati na yango. Melekisedeke azalaki Mokonzi ya Saleme, elingi koloba Mokonzi ya Yelusaleme, elingi koloba Mokonzi na kimia; Azalaki na tata to mama te, na ebandeli ya mikolo to nsuka ya bomoi te.

Yesu azalaki na tata mpe mama, na ebandeli ya mikolo mpe nsuka ya bomoi. Kasi Ye asalemaki “na molongo” ya Melekisedeke, oyo azalaki na ebandeli ya mikolo to nsuka ya bomoi te.

635 Melekisedeke azalaki Nzambe Ye moko. Melekisedeke azalaki Jehovah Nzambe, kaka Moko oyo akutanaki na Abraham, nsima na mibu, liboso na hema na ye. Abalusaki mokongo na Ye epai na ye; Alobaki: “Mpo na nini Sara aseki?” Ya solo. Azalaki Ye oyo atelemaki wana, kotaláká na ngámbo ya Sodoma. Abraham ayebaki Ye, mpo na kati ya ezipelo na ye, lóngo moko esimbaki elaka yango. Ezali te mpo amiyokaki ndenge moko boye, kasi Nzambe nde apesaki ye elaka yango. Mpe ntango akutanaki na emá monene wana, ayebaki ete Ezalaki na kati ya mosuni wana.

636 Atambolaki elongo ná Abraham, kuna mwa moke. Ayebisaki Abraham. Alobaki: “Lokola, Nakobombela Abraham makambo oyo, lokola azali mosangoli ya mokili? Nakosala yango te.” Boye: “Abraham, Nakoyebisa yo oyo Nalingi kosala,” tokolobela yango na mpokwa, “kuna na Sodoma,” mpe oyo bango nyonso balingaki kosala. Mpe kaka ntango Apambolaki Abraham, Azongaki na mipepe lisusu. Moto oyo autaki kozala wana mpe oyo azalaki na mputulú na bilamba na Ye, Moto. Mpe kaka yango te, kasi Ye aliaki mosuni ya mwana ngombe oyo Abraham abomaki, mpe amelákí miliki oyo eutaki na ngombe, mpe Aliaki mwa gató (mwa lipa ya masango), oyo batiá mateka. Ya solo mpenza. Na nsima, Azongaki na Theophanie.

637 Ezalaki nini? Mpo na nini Anyokwamaki na ntango wana te? Abotamaki naino lokola yo na ngai te. Kasi Asengelaki

kobotama na mosuni, mpo Akoka kokanga esweli wana. Wana ezalaki nzoto oyo ekelamaki. Wana ezalaki nzoto oyo Ye autaki kozua yango na calcium ná potasse uta na mabelé, mpe alobaki: “Fiuu,” mpe akotaki na kati na yango. Ezalaki eloko moko oyo Melekisedeke azalaki. Akotaki na kati na ye, na nzoto moko oyo Akokaki kotambola na yango liboso na ye na kati ya ezipelo, ezipelo ya bokeli na Ye Moko; ezipelo ya bokeli ya mwasi te, na nzela na libumu ya mwasi, na nzela na—na cellule moko, ata moke te. Kasi Ye akelaki oyo mpe akotaki na kati na yango, mpe asololaki, na molongo ya Melekisedeke.

638 Melekisedeke oyo azali Nani?

*Mpo ete Melikisedeke oyo, mokonji na Saleme, (elingi koloba Yelusaleme), mwana na Njambe oyo aleki likolo, (Solo mpenza), oyo ajuanaki na Abalayama wana abutwaki ye longwa na koboma mikonzi, mpe apambolaki ye;*

*Oyo mpe Abalayama apesaki ndambo na jomi ya biloko nyonso; liboso ye ajalaki Mokonzi na boyengebene longwa na ndimbola, (bolingo monene wana, Molimo monene wana na ebandeli). . . Mokonzi na boyengebene, . . nsima na yango. . . Mokonzi na Saleme, yango ete, Mokonzi na kimia;*

*Na tata te, na mama te, na etangeli na mabota te, na ebandeli ya mikolo te, to na nsuka na bomoi; . . .*

639 Ezalaki Nani? Atikalá kobotama te, Akotikaláká kokufa te. Ezali Nani? Ezalaki Nzambe, na ntembe te, ezalaki bongo, na etaliseli ya Nkolo Yesu. Ezalaki mpenza bongo. Kasi Asengelaki koya na nzela na mwasi, ndenge bino boyaki na nzela na mwasi. Mpe Asengelaki koya ndenge bino boyaki, mpo na kozongisa bino epai na Ye. Aleluya!

Ngolu ya kokamwa! mongongo na yango  
kitoko,

Oyo ebikisaki mobola, mokufi miso ya mawa  
lokola ngai!

Kala nabungaki, kasi sikawa nazuami na ngolu  
na Ye,

Nazalaki mokúfi miso, kasi sikawa namoni.

640 Nasosoli oyo Ye asengelaki kosala. Nzambe akomaki ngai, mpo ngai, na ngolu, nákoka kokóma Ye. Azuaki masumu na ngai, ete na nzela na boyengebene na Ye, ngai nákoka kozua Bomoi na Seko. Nakokaki kopona ngai moko te. Lolenge na ngai ezalaki ya mosumuki. Nazalaki na likambo moko te ná yango. “Nabotamaki na mokili, natongamaki na lisumu na nko, nayaki na mokili kolobáká lokuta.” Nazalaki ata na libaku malamu moko te, ata moke te; eloko moko te, ata na mposa te.

641 Yebisa ngulu ete azali “na libunga, koliáká potopoto,” okosala yango? Tala soki akoyoka yo mpenza. Yebisa eyánganga

ete azali “na libunga, ndenge aliaka ebembe,” mpe tala oyo akoyebisa yo. Soki akokaki kosolola: “Yo tala makambo na yo moko.” Ya solo.

642 Oh, kasi ngolu na Nzambe oyo ebongolaki lolenge oyo, mpe epesi ngai libaku ya kolinga, ya koyoka nzala mpe ya koyoka mposa: “Boboto ya bolingo na Yo ezali epai na ngai malamau koleka bomoi, E Nzambe. Motema na ngai ezali na mposa na Yo.”

643 Dawidi alobaki: “Ndenge nganzi eyokaka mposa ya bitima ya mai, elimo na ngai ezali na mposa na Yo, E Nzambe.”

644 Nzambe apésaki moto mposa wana, ya kokumbamela Ye, ya kolinga, ya koluka Ye. Kasi moto apengoli yango na mbela ya zabolo, mpe akei mpe abandi kolula basi, bisengo mpe biloko ya mokili, koluka kosepelisa bokeli ya bulee oyo Nzambe atíá na kati, mpo na kolinga Ye. Atie yango na biloko ya mokili. Kasi, ndeko, na ntango abongwani, mpe liziba oyo etondi na mwa nyama mikemike kati na yango, libulu oyo ezali na mobulu ya—ya ndenge na ndenge, epetolami mpe esukwami na nkisi, mpe batii Mai ya peto ya Nzambe na kati kuna, lisumu ekoki lisusu komama yango ata moke te. Amen.

O nalingi Ye mingi! Nakumbameli Ye mingi!  
Bomoi na ngai, Bongengi-na-mói na ngai,  
Nyonso kati na Nyonso na ngai!  
Mokeli monene akómaki Mobikisi na ngai,  
Mpe litondi mobimba ya Nzambe efandi kati  
na Ye.

Akitaki uta na nkembo na Ye, lisolo oyo  
kotikala libela na bomoi,  
Nzambe mpe Mobikisi na ngai ayaki, Nkombo  
na Ye ezalaki Yesu.  
Abotamaki na elielo, Azalaki mopaya epai ya  
bandeko na Ye Moko,  
Nzambe ya bolozí, mpisoli mpe mpasi ya kufa.

O nalingi Ye mingi! Nakumbameli Ye mingi!  
Pema na ngai, Bongengi-na-Moi na ngai,  
Nyonso kati na Nyonso na ngai!

645 E Nzambe! Ndenge nini Akokaki kosala yango? Moto ameká kokoma yango. Moto moko alobaki:

Soko totondisi mbu na mai ya mokanda,  
Mpe lititi moko na moko na mabelé ezalaki  
ekomeli;  
Likoló mobimba ezalaki lokasá,  
Mpe moto nyonso mokomi;  
Kokoma bolingo ya Nzambe ya likoló

Nzambe monene yango, ya Likoló, akómaki nzoto mpe aзуaki masumu na ngai!



Kokoma bolingo ya Nzambe ya likoló  
 Elingaki kokausa mbu;  
 Lokasa yango elingaki kokoka te,  
 Atako etandami longwa na likoló moko kino na  
 likoló mosusu.

646 Mpe mpo na kokomisa basangoli ya lobiko yango bázala na elikia ya solosolo, Akataki ndai na nzela na Ye moko ete Akosekwisa biso na mikolo ya nsuka, ete Akopesa biso Bomoï na Seko. “Mpe moto moko te akoki kobotola bango na loboko na Ngai.” Amen.

Tóbondela.

647 Okweisami mpo oboyaki bolingo na Ye? Okimaki nde Ezali na Ye oyo epambolami, Ezali ya nkembo oyo akómisi yo oyo ozali? Mpe sikawa tala yo oyo, na ntongo oyo, okómi kino awa na bomoi na yo, mpe libaku moko epesameli yo. Olingi kokoba kobika? Nzela ezali bobele moko mpo na kobika, ezali nde ndimela Nkolo Yesu. Soki yo, uta na motema na yo, ondimi ete Azali Mwana na Nzambe mpe oyambi Ye lokola Mobikisi na yo, mpe ondimi ete Nzambe asekwisaki Ye mpo na kolongisama na yo, soki olingi kondima yango likoló na mobóko wana, ezali ya yo sikawa.

648 Okolinga kotombola loboko? Elimo moko oyo ebongolá motema te, oyo akolinga kobongola motema na ntongo oyo, loba: “Kanisa ngai, ndeki, motei, wana tozali kokende na kobondela. Ngai mpe nakweaki. Nakotaki na lingomba, kasi na—nayebi ete na—nazuá naino oyo ozali kolobela te. Nabotámá naino na Molimo wana te, Ndeko Branham. Na—nazali na Yango te, esili. Nalingi ete óbondela mpo na ngai, mpo Nzambe ápesa ngai Yango na ntongo oyo.” Nzambe ápambola yo, mesie. Moto mosusu azali? Loba: “Nzambe, kómisa ngai ndenge Olingi ete názala. Nalingi ete Yo ózala. . . Nalingi kozala ndenge Yo olingi ete názala. Naboyaki bolingo na Yo.” Nzambe ápambola yo, mwana.

649 Bózela naino mwa moke.

Soko totondisi mbu na mai ya mokanda,  
 Mpe likoló mobimba ezalaki lokasá;  
 Litítí moko na moko na mabelé ezalaki  
 ekomeli,  
 Mpe moto nyonso mokomi;  
 Kokoma bolingo ya Nzambe ya likoló  
 Elingaki kokausa mbu;  
 Lokasa yango elingaki kokoka te,  
 Atako etandami longwa na likoló moko kino na  
 likoló mosusu.

Oh, bolingo na Nzambe, ezali mpenza monene  
 mpe peto!  
 Ekoki kopimama te, mpe ezali mpenza makasi!  
 Ekoumela libela,  
 Loyembo ya basanto mpe ya Banje.

650 Nzambe Molingami, solo moyembi oyo akomaki maloba yango azalaki kaka lokola bandimi na Yo mingi mosusu, kolukaluka, komeka kozua maloba mpo na kolimbola yango. Mpe ekomami na Biblia: “Lisusu, lokola motei azalaki na bwanya, alukaki mpe atiaki maloba na molongó.” Oh, ndenge tokosepela kozala na lolemo mpe maloba mpo tókoka kolimbola epai na bato oyo yango ezali mpenza, kasi tokoki komona yango na bibebu ya bato te. Seko mobimba, na ntembe te soko ekokoka mpenza komonisa yango, ndenge Nzambe ya Lola ayaki mpenza na mabele, mokolo moko, mpo na kobikisa basumuki, babola, babúngi, bato na mawa.

651 Nabondeli Yo, Tata, na mwa maloba oyo ezangi kobukana, to maloba oyo ebukana-bukana, na ntongo oyo, ndenge nasengelaki koloba, ete moto moko ázua kimia, esengo mpe kobondisama makasi, ye oyo azalaki koluka ebombanelo. Mpe tika ete elimo na bango ékangama, lokola lóngo na elaka oyo Nzambe akataki ndai mpo na yango, ete Akosekwisa bango na mokolo ya nsuka. Maboko ebele etombwami, na kati ya losambo, awa na tabernacle oyo. Nzambe, pesa bango elikia ya ngwi wana, sikasikawa. Tika ete bábwaka lóngo na Libanga ya bileko. Ata soki mbu etomboki ndenge nini, mpe mwa babwato na bango ekoki kopumbwa, bazali na lóngo, elaka ya Nzambe. Bakangami na yango: “Nzambe nde alobaki Bongo. Akoki kokosa te.”

652 “Ye oyo akoyoka Maloba na Ngai,” ndenge nameki koteya na ntongo oyo, “mpe akondimela Ye oyo atindi Ngai, Jehovah, azali na Bomoï na Seko; mpe akoleka na kosambisama te, kasi asili kolongwa na kufa mpe kosingela na Bomoï.”

653 E Yawe ya Seko, pambola bango lelo. Mpe tika ete moto nyonso awa, oyo azali na nsé ya Makila te, oyo elimo na ye ebongwani naino te, tika ete ésalema sasaipe, Nkolo. Yo nde okokisaka mabombami. Nyonso wana ezali ya Yo. Epesami na Yo. Nabondeli ete Ópesa bango yango, Bomoï na Seko. Tika ete, mokolo moko, kuna na ngámbo mosusu, wana, moko na moko, tozali kokatisa lobwaku, tika ete tókutana kuna, epai bakopesana “mbote ya bokabwani” lisusu ata moke te.

Mokolo moko, tokokóma na ebale, na nsuka ya ntango,  
 Ntango makanisi ya nsuka ya mawa ekosila;  
 Moto moko akozala kuna, akozela biso, mpo na kolakisa biso nzela,  
 Nakosengela kokatisa Yaladene ngai moko te.

Ekozala na Moko, Moto moko akozela ngai,  
mpo na kolakisa ngai nzela,  
Nakosengela te kokatisa Yaladene . . .

<sup>654</sup> Moto nyonso oyo azali na elikia wana átombola loboko sikawa, wana otomboli motó.

Nakosengela te . . .

Sikawa, bókumbamela Ye kaka. Liteya esili. Bozali na esengo, boye te? Nzambe akataki ndai ete . . . Nzambe akataki ndai ete Akokutana na bino kuna.

Yesu akufaki mpo na kolongola masumu na ngai nyonso;  
Ntango nakomona molili . . . (Olobi nini? Esweli esili kolongwa.) Akozala kuna mpo na kozela ngai,  
Nakosengela kokatisa Yaladene ngai moko te.  
Mbala mingi batikaka ngai, mpe nalembaka . . .

Sikawa bókumbamela Ye kaka.

. . . ezali lokola ete baninga na ngai nyonso basili kokende;

Osilá kokóma na esika yango?

Kasi likanisi moko epesaka ngai mpiko . . .  
(Elaka ezalaki nini?) . . . epesaka motema na ngai esengo,  
Nakosengela te kokatisa Yaladene . . .

<sup>655</sup> Sikawa, bana na elaka, bókumbamela Ye mpo asalaki yango.

Nakosengela kokatisa Yaladene ngai moko te,  
Yesu akufaki mpo na kolongola masumu na ngai nyonso;

Nini ekosalema sikawa?

Ntango nakomona molili, Akozala kuna mpo na kozela ngai,  
Nakosengela kokatisa Yaladene ngai moko te.  
Ntango nakokóma na ebale . . .

Moto na moto kati na bino akokóma wana. Molili moko ya monene mpe moindo ekozala wana, liboso na yo. Ezali ekuke monene. Okokota kuna, moko na mikolo oyo, ntango mosusu liboso ete moi élala, ntango mosusu liboso ete losambo ésila na ntongo oyo. Okokota kuna. Mbala nyonso motema na yo ebetaka, opusaka litambe moko mpembeni na yango.

Kasi ntango nakomona molili, Akozala kuna mpo na kozela ngai,

Alobaki ete Akosala yango. Akataki ndai ete Akosala yango.

Boye, nakosengela kokatisa Yaladene ngai moko te.

656 E Nkolo Mopambolami, na ntongo oyo, mitema na biso etondi meké.

657 Kokanisa ntango motema ekobanda kotika kobeta, mpe infirmière akofina moniuku zinga-zinga na motó na yo. Mpe maboko na yo, okokoka lisusu koningisa yango te. Maboko na yo ekómi malili makasi. Bana na yo, mama na yo, balingami na yo bazali koganga mpe kolela. Ekuke monene wana efungwani, kuna. Akozala kuna mpo na kozela.

658 Dawidi alobaki: “Soko nalali na ewélo, Akozala wana.” Nakosengela kokatisa yango ngai moko te. Ntango mwa matangá ya ebale ekobanda kokwea na elongi na biso, Nzambe akozua bwato ya lisungi yango, akokamba biso kino na ngámbo na yango. Alakaki ete Akosala yango. Dawidi mosakoli alobaki: “Iyo, ata natamboli na libula na molili na kufa, nakobanga mabe moko te. Ozali na ngai elongo. Mpango na Yo mpe lingenda na Yo ezali kobondisa ngai.”

659 Nkolo, tozali na esengo mingi lelo, mpo tokómi basangoli ya elaka yango. Lelo tokómi na Bomoi na Seko na kati na biso, mpo tolingi Nkolo Yesu mpe tondimeli Ye, tondimi Liloba na Ye mpe malakisi na Ye. Mpe Apesi biso, lokola elembo ya kondima na biso, Molimo Mosanto, elembo ya Molimo Mosanto. Kondima na biso, na kati na biso, ekangami na lóngo. Mpe atako mbala mingi totambolaka na kati ya molili tuu, mbala mingi tobetaka mabaku na nzela, kasi lóngo na biso esimbi makasi. Eloko moko ezali na kati na yango, kuna mosika, oyo emonani lokola ete ezali kokamba, koloba: “Koba kotambola. Tozali kokende liboso.”

660 Nzambe, pambola biso. Tosengeli na Yo. Batelaka biso ntango nyonso na bosembo mpe bosolo, kino ntango Okoya mpo na biso, tokokumisa Yo kati na bileko na bileko. Mpe mokolo wana, ntango tokotelema na mabelé... Makolo na ye oyo epambolámi enyati naino mabelé te. Azali kuna, na mipepe; basantu mpe basíkolami ya bileko nyonso, ya bileko ya kokengela nyonso, ya liboso, ya mibale, ya misato, ya minei, ya mitano, ya motoba, mpe ya nsambo, bango nyonso bakotelema wana, balati boyengebene na Ye; tokolatisa Ye motole ya Mokonzi na bakonzi mpe Nkolo na bankolo, mpe koyemba masolo ya lisiko. Mwa mitema na biso ekolenga wana tozali kotala Ye Oyo alingaki biso mpe Amipesaki mpo na biso. Atako tokokaki kolingama te mpe tozalaki basumuki, Klisto akufaki mpo tókoka kobika. Totondi Yo mpo na yango, Tata, na Nkombo na Klisto. Amen.

661 Bolingi Ye? Oh, Azali mpenza solo. Bomiyoki te lokola ete na lolenge moko boye, lokola bóyamba Ye, boye te? Bokolinga mpenza komibenda na mabolongo mpo na kosimba makolo na Ye, boyebi, boye te?

662 Boyebi, bato moko bazaláká koya na mayangani na ngai na Phoenix, Arizona, koloba: “Nakosepela kosolola na Ye na ntina na yango. Nakosepela koloba: ‘Nkolo, Olingaki ngai ntango nzela na ngai ekómaki molili tuu.’” Nakosepela mpenza kosolola na Ye na ntina na yango liboso ete tókatisa. Na—nalingi komona Ye. Na—na—nalingi kaka komona Ye. Kokanisa ndenge nakomiyoka, ndenge mwa motema na ngai ekolenga ntango nakomona Ye atele mi wana.

663 Namituná mbala mingi: “Nalingaki kosepela koyóka Mongongo wana koloba: ‘Boya epai na Ngai, bino nyonso oyo bolembí na misala mpe mikumba ya bozitó. Nakopesa bino kopema.’”

664 Ntango mosusu nakoyoka yango te ndenge Alobaki yango na ntango wana, kasi nalingi koyoka Ye koloba: “Lelo nde mokolo ya nsuka. Osali mosala malamumu, mosali na Ngai ya malamumu mpe ya sembo, sikawa kotá na bisengo ya Nkolo oyo ebongisamaki mpo na yo.” Uta ntango boni?

665 “Uta ntango obikisamaki?” Te, ndeko.

666 “Uta kozalisama ya mokili, ntango Namonaki yo mpe Nayebaki yo liboso, mpe Nabongisaki yo mpo ya Bomoi na Seko,” opambolamaki na ntango yango. “Baoyo nyonso Ayebaki liboso, Abengaki bango.” Ezali solo? “Baoyo nyonso Abengaki, Alongisaki bango. Baoyo Alongisaki, Asílá kokémbisa bango.” Yango mpenza. Ayebaki biso liboso, Abengaki biso, Alongisaki biso, mpe tosili kokembisama elongo ná Ye, na nsuka ya mokili, kokende kozua libonza na biso. Bozali na esengo, boye te? Ya solo, ekosala ete bólinga Ye. Ntango okokaki komisunga te, mpe tala Ye ayaki mpe asalaki yango mpo na yo.

667 *Épambolama, Ekanganeli Oyo Esangisi*, Ndeko mwasi Gertie. “Mitema na biso na bolingo ya Baklisto,” wana tozali na mwa bondeko ya kokumbamela awa sikawa, na bongo tokobondela mpo na babeli. Nzambe épambola bino. Bino baoyo botombolaki maboko epai na Klisto na ntango oyo, bómizuela esika moko ya kosambela mpe kosalela Ye.

668 Sikawa, tókumbamela Ye sikawa, lokola eyanganelo, bino nyonso ba-Methodiste, église de Dieu, ba-Assemblée de Dieu, ba-Presibiterien, ba-Lutherien, ba-Katoliko. Bisó nyonso elongo sikawa, tóyemba sikawa.

Epambolama, ekanganelo oyo esangisi  
Mitema na biso na bolingo ya Klisto;  
Bondeko yango ya molimo  
Ezali lokola oyo ya Likoló.

Liboso na Ngwende ya Tata na biso,  
Tosopi libondeli na biso ya molende;  
Nsomo na biso, elikia na biso, ntina na biso  
ezali moko,  
Libóndisi na biso mpe mitungisi na biso.

Ntango tokabwanaka,  
 Esalaka biso mpasi na kati;  
 Kasi tokokóba kozala elongo na... (Ba-  
 Metodiste boni, ba-Batiste, mpe bamosusu  
 nyonso?)  
 Mpe kolikia kokutana lisusu.

<sup>669</sup> Ezali kosala ete bómiyoka malamú, boye te? Tobaluka mpe tópesana mbote ya loboko sikawa, wana tozali koyemba yango lisusu.

Liboso . . .

Pesa mbote ya loboko, na moto oyo azali nsima na yo, liboso na yo, epai na epai.

. . . Ngwende,  
 Tosopi libondeli na biso ya molendé;  
 Libóndisi na biso mpe mitungisi na biso.  
 Sikawa, ntango tokokabwana,

Tokolingana bamoko na bamosusu.

Epesaka . . .

Elingaki kozala malamú ete liyangani yango ékóba? Bomoni? Nde ndenge tokanisaka.

. . . mpasi na kati;  
 Kasi tokokóba kozala elongo na mitema, (na  
 bomoko)  
 Mpe kolikia kokutana lisusu.

Soko lisusu awa te, na Mokolo monene wana, tokokutana.

<sup>670</sup> Sikawa, Tata, yamba losambo na biso na ntongo oyo. Kamata Liloba mpe lona Yango na mitema ya bandimi. Tika ete bátenga-tenga lisusu te, lelo likoló, lobi na nsé, kasi tika ete Maloba oyo ézua esika na yango ya kopema na mitema ya mondimi nyonso. Koyeba ete: “Nzambe asíli mpenza kokata ndai, mpe makambo ezali mibale oyo ebongwanaka te. Kozanga kobongwana ya Nzambe, elingi koloba, ete ekoki kosalema te ete Ákosa, mpo basangoli ya lobiko oyo bázala na elikia ya makasi, oyo etele mi ngwi mpe ebatelami, lóngo kati na elimo.” Koyeba ete: “Nzambe alakaki biso, na ndai oyo Akataki. Ya liboso, ete Akoki kokosa te; ya mibale, Akataki ndai, likoló na yango, ete Akosekwisa biso na mokolo ya nsuka mpe Akopesa biso Bomo na Seko.” Koyeba ete: “Nsima na biso kobengama, Alobaki ete Ayebaki biso liboso na kozalisama ya mokili, mpe Abongisaki biso liboso mpo na lokumu ya bana na nzela na Yesu Klisto. Mpe Ayebaki biso liboso. Abengaki biso. Mpe ntango Abengaki biso, Alongisaki biso.” Tokoki komilongisa biso moko te, boye, Alongisaki biso na nzela na liwa ya Mwana na Ye Moko. “Baoyo Alongisaki bango, Asili kokembisa bango.” Liloba esili kolobama. Mpe tozali na nzela, kokendéké liboso, kosepela na esengo, wana tozali kokende na Nkembo.

671 Pesa bato kondima, mpe tika ete mwa bizaleli mpe makambo oyo ekangamaka na bato, tika ete báningisa nzoto mpo étika bango, na ntongo oyo, na nzela ya Liloba na Nzambe oyo ezali lóngo ya elimo, etelemi ngwi mpe ebatelami. Tika ete báningisa nzoto mpo bákabwana na bizaleli na bango, mwa nkanda na bango. Mpe makambo oyo ezalaki. . . Ndenge Paulo alobaki, na eteni ya liteya oyo ezali koya nsima na mwa mikolo, ete: “Tika ete tótia bozító nyonso mpembeni, mpe masumu oyo ekangaka biso na petee, mpo tókoka kopota mbangu na motema molai, na momekano oyo ezali liboso na biso; wana tozali kotala mobandisi mpe mosukisi ya kondima na biso, Yesu Klisto, Oyo amekamaki na ndenge nyonso lokola biso, kasi Asalaki lisumu te.” Nzela epesamaki ete Ámekama, kasi Akweaki na komekama te. Mpe biso tomekamaka mpo tósala masumu, kasi mpo tókwea te. Mpamba te Bomoi oyo ezali kati na biso ezali lóngo ya esukeli na biso ya Seko, mpe tosimbaka yango na motema na biso lokola eloko ya motuya monene.

672 Sikawa, bato ebele, Satana abeti bango na bampasi. Tolengelami mpo na kobondela mpo na bango, Tata. Tika ete, wana bazali koleka na nsé ya Liloba na Nzambe lelo. . . Liloba ya motuya wana oyo euti koteyama, Biblia ezali kotatola, Banje na Nzambe batelemi mpembeni, mpe Molimo Mosanto ya nkembo, likoló na nyonso, azali awa mpo na kopesa litatoli na Liloba. Sikawa, Tata, wana bazali koleka na nsé ya Liloba ya elaka, na ntongo oyo, tika ete bálóngwa awa babiki. Bálóngola biloko na bango ya bibosono, bálóngwa na bakiti mpe—mpe bambeto ya bibosono oyo balalaki likoló na yango, mpe bábika. Sala yango, Nkolo. Tika ete baya lisusu na liyangani oyo elandi, mpo bazali na ndingisa ya koya, to na ba-losambo na bango moko, na esengo, kotalisa makambo minene oyo Klisto asali. Tozali kosala mosala oyo mpo na nkembo na Yo, na Nkombo na Yesu. Amen.

673 Nasengeli kosenga bolimbisi mpo na elaka moko oyo napesaki, ete na ntongo oyo, tolingaki kozua mokapo ya 7, kasi nakomi kuna te. Mpe tosengeli kopesa mwa ntango awa mpo na—mpe na oyo, mpo na molongo ya mabondeli. Mpe sikoyo, na mpokwa, soki Nkolo alingi, tokozua mokapo ya 7, mpo tóyeba soko Melekisedeke oyo azalaki Nani. Bato boni bakolinga koyeba yango? Oh, tokolebela noki-noki na ntina na Ye, koyeba mpenza Nani Ye azali. Mpe Makomi elobi Nani Ye azali. Bomoni?

674 Mpe Scofield alobi ete ezalaki “bonganga.” Ndenge nini ekokaki kozala bonganga, kozanga ebandeli to nsuka? Bomoni, ezalaki bonganga te. Ezalaki nde Moto, Melekisedeke (Nkombo), Moto.

675 Ndakisa, ezali kozanga limemia te, kasi Science Chrétienne elobaka ete Molimo Mosanto ezali “likanisi.” Mpe Biblia elobá: “Ye, Molimo Mosanto.” Mpe Ye ezali likitana bomei. Ezali Moto; likanisi te. Ezali Moto. Na ntembe te.

676 Mpe Melekisedeke azali Moto, Moto Oyo azalaki na ebandeli ya mikolo te to nsuka ya mibu te. Azalaki na tata to mama te, to bakitani te. Mpe tokomona Nani Ye azali, soko Nkolo alingi, na mpokwa, na nzela na Liloba. Bolingi Yango? Oo! “Liloba na Yo ezali mwinda na nzela moke na ngai mpe na makolo na ngai.” Oh!

677 Sikawa, okoloba: “Ndeko Branham, nazali kososola Yango nyonso te.” Ngai mpe.

678 Kasi, mokolo moko, nazalaki koteya na Kentucky. Epai na bato moko ya sika, ba-Katoliko mpe bato ya ndenge na ndenge, oyo ntango mosusu bakokoka kososola makambo ya bozindo, ya bozui oyo ya Makomi te. Nazalaki koteya na ntina na lobiko na nzoto kouta na Nzambe. Elenge mwasi moko ná makolo ngulu, amemaki. . . Azalaki na nsé ya mibu zomi na mitano, azalaki na bebé moko oyo azalaki na bolembu ya misisa ya binámá ya nzoto. Nalobaki: “Likambo nini, ndeko mwasi, ná bebé na yo?”

679 Alobaki: “Azali na bakolénga-lenga.” Ayebaki ndenge ya kobenga yango te, bolembu ya misisa ya binama. Ayebaki ndenge ya kobenga yango te.

680 Elenge mwasi yango, ntango mosusu atikálá kolata sapato te, na bomoi na ye. Molingami ya mobali moko, ná nsúki ya milai ekitá. Nalobaki: “Ondimi?”

681 Mpe mwa miso na ye ya mpembe lokola libende etalaki ngai. Alobaki: “Iyo, mesie. Nandimi mpenza.”

682 Nazuaki bebé yango. Mpe wana nazalaki kobondela mpo na ye, atikaki kolénga. Ah-hah. Mpe esilaki, esilaki.

683 Mokolo oyo elandaki, nazalaki na bokila ya biséndé, na mopanzi ya ngomba moko. Nayokaki bato moko bafandaki kuna bazosololáká, mpe sí ya moteur ezalaki kosala makelele. Mpe napusanaki wana na mayele. Nazalaki na bokila ya biséndé. Bazalaki kosolola na ntina na ngai, bafandaki kuna, bazalaki kotafuna tumbako mpe kobwaka nsoi, nkasá ezalaki kopumbwa, *boye*. Mpe bazalaki kosolola na ntina na, sikawa, na ntina na liyangani ya mpokwa oyo eutaki koleka. Moko na bango alobaki: “Namonaki bebé yango. Nalekelaki wana, na ntongo ya lelo. Azalaki lisusu kolénga te na ntongo ya lelo.” Bomoni? Alobaki: “Esalemaki mpenza.” Mpe azalaki kobwaka nsoi.

684 Mpe batelemisaki mandóki na bango mpembeni na nzete, bongo, namilobelaki ete ekozala malamú námitalisa. Boyebi, bazalaka mpe na bitumba kuna. Boye, napusanaki. Nalobaki: “Mbote, bandeko.”

685 Engambé mobali wana, emonanaki lokola ete ye nde azalaki koloba, azalaki na tumbako ya kotafuna na monoko, *boye*, kuna na mpembeni *boye*, mpe azalaki mbinga, kingo molai. Mpe alataki ekoti moko ya monene ya kala, ekitá na elongi na ye. Abalolaki elongi mpe amonaki ngai. Atombolaki loboko



mpe azuaki ekoti yango, abwakaki yango mbangu, mpe asalaki *kiuu*, amelaki tumbako ya kotafuna wana, alobaki: “Mbote, mokengeli.” Bomoni? Iyo, mesie. Limemia. Mpe ezali ya solo. Ndenge nini esalaki ye mabe te, nayebi te, kasi esalaki ye mabe te.

<sup>686</sup> Boye, na mpokwa oyo elandaki, ntango nazongaki, ezalaki na mobali moko wana oyo alingaki kobendana ná ngai mwa moke. Akendeki na losambo moko oyo bandimaka lobiko na nzoto kouta na Nzambe te. Boye, ezalaki lingomba Metodiste, na White Hill, na Kentucky. Boye a—akendeki na . . . Atelemaki libanda. Azalaki na mwinda na loboko. Mpe alobaki: “Nalingi koloba likambo moko, motei. Nakoki mpenza kondima Yango te, mpo nazokoka komona Yango te.”

<sup>687</sup> Nalobaki: “Ozokoka komona Yango te?”

<sup>688</sup> Alobaki: “Te.” Alobaki: “Ngai moko nazali na bokono. Kasi,” alobaki, “nazokoka na ngai komona Yango te.”

Nalobaki: “Ofandaka wapi?”

Alobaki: “Kuna na Big Renox.”

Nalobaki: “Ee, okozonga na ndako ndenge nini?”

Alobaki: “Ee, nakokende ndako na makolo.”

Nalobaki: “Okoki komona ndako na yo?”

Alobaki: “Te, mesie.”

Nalobaki: “Molili ezali makasi mingi na butu oyo, mapata etondi.”

Alobaki: “Iyo.”

Nalobaki: “Okokende ndako ndenge nini?”

Alobaki: “Ná mwinda oyo.”

Nalobaki: “Mwinda etalisaka nzela mobimba kino na ndako te.” Nalobaki: “Okokende ndenge nini?”

Alobaki: “Oh, nakotambola ná mwinda.”

<sup>689</sup> Nalobaki: “Ezali bongo. Ozali na pole ya mwinda sikawa, mpe ntango nyonso okobwaka lokolo na ngámbo *oyo*, pole ekokoba kotalisa liboso na yo. Soki okobi kotambola, pole ekokoba kokende elongo ná yo.”

<sup>690</sup> Yo mpe sala yango na ntongo oyo, yo oyo ozali na mposa ya Klisto, Nganganzambe Mokonzi, Molobeli mpo na bokono na yo, to maladi na yo, to ya elimo na yo. Ntango mosusu ososoli Yango te. Tososolaka te. Kasi totindami “Kotambola kati na Pole, wana Ye azali kati na Pole yango.” Bwaka lokolo moko kati na Pole. Mpe ntango ozali na Pole elongo ná yo, Pole ekongenga kino na mokolo be yango. Ekotalisa nzela liboso na yo.

Mpe tokotambola na nzela monene oyo ya kala,  
 Koyebisa na bisika nyonso nakokende,  
 Ete malamau názala Moklisto ya ntango kala,  
 Nkolo,  
 Na esika ya kozala nyonso oyo nayebi.

Bosílá koyoka loyembo yango ya kala?

Eloko moko te ekokani na Moklisto ya ntango  
 ya kala,  
 Oyo alakisaka bolingo ya Baklisto;  
 Tozali kotambola kati na nzela monene ya kala,  
 Mpe koyebisa na bisika nyonso tokokende,  
 Ete malamau názala Moklisto ya ntango ya kala,  
 Nkolo,  
 Na esika ya kozala nyonso oyo nayebi.

<sup>691</sup> Nalingaka yango mingi. Malamu. Sikawa tokobondela mpo na babeli. Tozali te. . . Tobetaka ntólo te ete tokoki kobikisa babeli. Soki tozalaki kosala bongo, tokozala koloba lokuta. Mobeli nyonso oyo azali awa asílá kobikisama. Yango nde oyo Makomi elobi. “Na mapipi na Ye tobikisamaki.” Boye te?

<sup>692</sup> Mosumuki nyonso oyo azali awa, soko esalemi ete moko azali, osílá kobikisama ntango Yesu akufaki. Kasi komeka kokufa awa ata moke te, na ntango oyo libaku epesameli yo, ya kokende Liboso na Ye bongo koluka kondima Yango. Esálémá mpo na sasaipi. Osengeli koyamba Yango nde sika-sikawa. Soko oleki Makila, na bongo ozali eloko mosusu te bobele. . . Osili kosambisama, mpamba te okosambisama kokokana na lolenge okamataki Mbondi oyo Nkolo Yesu Klisto apesaki. Bomoni? Ozali. . . omisambisi yo moko wana.

<sup>693</sup> “Na bongo, Azokisamaki mpo na masumu na biso, mpe na mapipi na Ye tobikisamaki.” Boye, nazali na eloko moko te, mpo na kobikisa bino. Lingomba ezali na eloko moko te, mpo na kobikisa bino. Eloko bobele moko oyo tokoki kobondela, ezali ete kondima na bino ékweya te, ete óya na etumbelo na ntongo oyo mpo na koyamba Klisto lokola mobikisi ya nzoto na yo, ndenge osalaki mpo ázala Mobikisi ya molimo na yo. Kozanga ata. . . Nzambe asalaka bikamwa. Atalisaka bilembo minene. Bakúfi miso, bakúfi matoyi, bamimi, nyonso wana, babikaka awa mpenza na tabernacle. Kasi ésalema to te, biso tondimaka Yango, ata bongo. Mbala mingi, makambo yango esalemaka na nzela na bimononeli.

<sup>694</sup> Bato boni bazalaki awa, eleki ba-Lomingo pene na misato, to minei, ntango mobali wana akotaki awa, azalaki mokúfi miso mpe ná paralysie, to afandaki na kiti ya bibosono, wana mosisa na ye ya equilibrio ebebaki? Mpe liboso nábima na ndako, namonaki ye na emononeli: “Ete mobali moko akozala kuna, ná nsuki ya moindo, ebandi kokóma mpembe. Mwasi na ye azali kitoko, azali na mibu pene na ntuku motoba. Ye mwasi

akoya mpe akozala kolela,” mpe akotuna ngai. “Ete názonga mpo nábondela mpo na mobali na ye.” Ye mobali afandaki wana.

695 Bongo nayaki awa. Nalobaki na bandeko na ngai mosusu awa: “Bólandela yango.”

696 Mpe ntango tokitaki liboso na etumbelo, bamosusu basilaki kobondela. Ntango nakendeki kobondela, nalongwaki wana mpe nazongaki awa. Mpe mwasi na ye atelemaki mpe ayaki mpenza ndenge Nkolo asilaki koloba ete ekosalema. Bato bazalaki kotala, mpo na komona soki ekosalema bongo. Ezangaka kokokisama ata moke te. Na bongo ntango atambolaki . . .

697 Nayaki komona ete mobali moko, Dr. Ackerman, ya Birdseye, na Indiana, ye moto atindaki ye awa; oyo azali Mokatoliko, mpe mwana na ye ya mobali azali sánzó na monastére kuna na Saint Meinrad. Mpe Dr. Ackerman azali moninga na ngai ya bokila, ye moto atindaki mobali yango awa. Mpe Nkolo alakisaki ngai mobali moko na nsuki ya moindo, oyo alingaki kotinda ye, kasi nayebaki te soki ezalaki nani.

698 Nalobaki: “Ezalaki nde Dr. Ackerman?”

699 Alobaki: “Ezalaki ye.” Bomoni? Na bongo mobali yango . . .

700 Nalobaki: “Ezali YANGO ELOBI NKOLO.” Napusanaki. Nalobaki: “Mesie, telema.” Azalaki mokúfi miso mpe akokaki te . . . ye . . . Mo—mosisa ya equilibre esilaki kobeba. Akokaki kotelema ye moko boye te. Bomoni? Azaláká bongo mibu ebele, azaláká na lopitalo ya ba-Mayo mpe bipai na bipai. Mpe nabondelaki kaka mpo na ye, mpe natelemisaki ye. Ye wana, abandaki kotambola.

701 Liboso, alobaki: “Nazali komona yo te.” Na nsima, agángaki: “Iyo. Namoni.” Miso na ye efungwamaki na mbala moko, azalaki Orthodox, mwasi na ye, Presbiterien.

702 Bato mosusu bakanisaka ete “ba-Presbiterien bagángaka te, ná ba-Orthodox.” Bosengelaki koyoka bango. Solo mpenza. Bazalaki kogánga mpe koyambana. Azongaki, azuaki kiti na ye ya bibosono, mpe abimaki, akitaki na bibuteli, lokola moto nyonso, akómaki komona, kosolola mpe—mpe nyonso wana.

703 Nauti koyamba mokanda moko kouta na ye, to abengaki, mokolo mosusu wana. Nabanzi ete Ndeko Cox akendeki epai na ye. Alobaki: “Azalaki koyoka miso na ye lokola ekopela móto.” Ya solo mpenza. Ezali mosisa, misisa ya miso ezali kokóla mpe kozonga na bomoi, boyebi, mpe kozua esika na yango. Elakeli mabe yango elongolamaki.

704 Soki botikeli ezalisi ésala ndenge na yango, soki eloko moko epekisi ezalisi te, na bongo eko—ekosala mosala na yango mpenza. Soki okangi singa na loboko, mpe makila ezali lisusu kotambola te, suka-suka loboka na yo ekokufa. Sikawa, mpamba te, na ezalela ya makambo, ekozala malamú soko otiki yango kimia. Kasi eloko moko epekisaki ezalisami. Na bongo, soki

okoki komona yango te, nzela ezali te mpo monganga ásimba yango. Akoki bobele kosala na nzela na biloko bibale: oyo ye akoki komona, mpe oyo ye akoki komama. Yango nde bobele eloko oyo ye akoki kosala na yango: oyo azali komona mpe oyo azali komama.

<sup>705</sup> Soko akoki komona yango te, na bongo esengeli kozala ya molimo. Na bongo, bobele likambo moko, likambo bobele moko nde ekoki kosalema; tobondeli, Klisto alongoli elakeli mabe yango, abangani molimo mabe, mpe yango ebandi kokóma malamumu, kobika. Ebiki, mpe yango nde nyonso oyo esengeli. “Na Nkombo na Ngai bakobengana milimo mabe.” Boye te? Ezali elaka epai na lingomba. Ezali elaka ya nguya. Ezali nini? Yango, ezali Bozali na Ye elongo ná biso. Sikawa, eloko ezali kopekisa biso kobonga be, na ntongo oyo, kosala makambo yango ndenge Ye asalaki yango, ezali mpo tozali naino na kati ya ezipelo. Bomoni? Kasi tozali koyoka eloko moko kuna, oyo ezali koyebisa biso: “Oh, iyo.” Bomoni?

<sup>706</sup> Mpe ntango oyambi lobiko na yo ya nzoto, ata soko ezipelo elobi nini, ezali oyo Liloba elobi. Bomoni? Ezali bongo. Ezali bongo. Mpe li—li—Liloba nde ekonzaka, ntango nyonso, likoló na nyonso. Liloba ya Seko ya Nzambe!

<sup>707</sup> Bótala Sara, libumu na ye esilaki kokufa, ná mibu ntuku libwa, afandaki elongo na mobali na ye banda ntango azalaki na mibu pene na zomi na motoba to zomi na nsambo, bana te; Abraham ná mibu mokama. Nzambe abalukaki mpe apesaki bango mwana yango. Bomoni? Mpamba te, bandimaki. Bazalaki kobenga biloko oyo ezalaki te, lokola ete ezalaki. Landa nzela yango na ntongo oyo, moninga.

<sup>708</sup> Mpe na mpokwa ya lelo, tozali kozela . . . Soki boyei kotala biso, tozali na esengo ya koyamba bino awa na ntongo oyo. Mpe Nzambe ázala elongo na bino. Mpe soki okozala na engumba oyo na mpokwa, tokosepela koyamba bino na mpokwa ya lelo, mpo na eteni ya liteya oyo etikali, na ntina na Melekisedeke. Na bongo, soki okozala te, mpe ozali na losambo epai osambelaka, kende na losambo na bino. Yango nde—yango nde esika na yo ya lotomo. Soko ozali mondimi ya lingomba moko, kende kuna. Oyo ezali bobele mwa tabernacle moko, esika toanganaka mpe tozalaka na bandeko bamoko na bamosusu. Sikawa, Nkolo apambola bino.

<sup>709</sup> Mpe Ndeko mwasi Gertie akobetela biso, *Monganga Monene Abelemi Sikawa*. Mpe moto moko azali awa, oyo alingi ete tóbondela mpo na ye? Tombola loboko, baoyo balingi koya na molongo ya mabondeli, kotia kondima na bino na Klisto. Malamumu. Bokoki kosala molongo na ngámbo oyo ya losambo, soki bolingi. Mpe soko bakobenda kiti yango mwa moke, ndeko mobali, soki olingi, mpo tózua mwa esika kuna, mpo tókoka kolekisa bato. Boya na ngámbo oyo.

<sup>710</sup> Tolingi kobondela sikawa, wana tozali koyemba. Nakosenga na bampaka oyo bazali awa, ya ebongiseli to lingomba nyonso, ézala oyo wapi, soki ondimaka lobiko na nzoto kouta na Nzambe, okolinga kotelema awa elongo na ngai na etumbelo oyo, mpo na kobondela mpo na babeli? Tokosepela kozala elongo na yo. Ata ya denomination nini, to ya denomination moko te, to ózala nani, tokosepela kozala elongo ná yo. Okolinga koya awa sikawa, mpo na libondeli? Yaka kotelema elongo ná ngai.

Ndeko Neville, soki okoki koya na mafuta.



*BAEBELE, MOKAPO YA MOTOBA* <sup>3</sup> LIN57-0915M

(Hebrews, Chapter Six <sup>3</sup>)

MATEYA LIKOLO NA BUKU YA BAEBELE

Liteya ya Ndeko William Marrion Branham oyo, eteyamaki liboso na Anglais mokolo ya Lomingo na ntongo, mwa 15, na sanza ya libwa, na mobu 1957, na Branham Tabernacle ya Jeffersonville, na Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)